



明僧弘秀集卷三

虞山毛晉子晉父編

見心九十一首

寄洞庭葉隱君

一舸南歸鬢欲華
買山湖上卧烟霞
尊知北海應多酒
園擬東陵亦種瓜
丹壑泉春雲碓藥
橋林風掃石牀花
傳家自與隣翁異
只說藏書有五車

遊石湖蘭若

荷花蕩漾湖水深
上有蘭若當高岑
客吟時見猿

鳥下僧定不聞鍾磬音
雨香秋林橘子熟雲落空
澗棠梨陰閒來掃石坐
竹裏靜與山人論素心

西湖二首

芙蓉灣口綠陰斜
吹笛何人隔彩霞
驚起沙頭雙翠羽
銜魚飛上刺桐花

流觴亭子鳳山阿
都護行春小隊過
笑擲金錢花底醉
玉簪彈出白翎歌

寄王一都事四首

我昔鍾陵蚤識君

頻分滕王閣上吟

疎雨孺子湖邊看
白雲周鼎商彝存
古制洛經岐篆見
遺文東游此日重
相會故國兵塵不
忍聞獨向青山斲
紫芝卧雲松下住
多時賈生慟哭非
無策賀監清狂漫
有詩酒熟每邀隣
父飲囊空任使世
人嗤近聞徧寫湖
光好吟對梅花雪
滿枝宦遊隨地問
畊鋤買占湖山十
畝居天北故人來
遠信浙東從事拜
新除嗟休祿薄生
無計但得身閒樂
有餘飽啖黃精一
千石蓬萊何日候
仙車瀟灑茅堂旁
釣磯春山擁坐翠
成圍已知地僻幽

棲穩莫笑官閒生事微五柳門前陶令醉百花潭
上杜陵歸古來言行關榮辱好向風塵早息機

寄伯溫左丞兼簡本初樞密四首

學士風流玉雪標早陪鳳輦聽仙韶光分蓮炬從
天下香帶爐烟近日飄書擬漢秦誇二篆史修南
北見三朝承恩曾記東來日繡斧光華擁使輶
江淮烽火數州連分鎮東吳有歲年化雨早清蛟
蜃氣文星夜動斗牛躔貢來南粵終歸漢書入聊
城遂破燕天下澄清今日望角巾未許賦歸田

賀蘭公子鄔僉書早握銀符贊上樞材屬經綸思
稷契兵知合變說孫吳春吟茂苑花圍座夜醉官
壚酒滿壺遙憶別來今七載每煩傳語到慈湖
別來鄞海重相思滿目兵塵厭亂離寒製綠荷聊
禦臘晨炊黃獨謾充饑廬山誰問東林社嶽麓新
傳北海碑多謝高文賁泉石虹光白日走蛟螭

附周伯琦次韵四首

字伯溫號玉雪坡鄞陽人至正間由翰林

直學士兵部侍郎拜監察御史累遷江東

肅政廉訪使江浙行省左丞精篆隸書有詩文集行世

雙峰玉立儼高標萬壑松風協護韶東麓久聞
金刹樹半空時見寶花飄清泉基剏傳唐代白
馬神通自漢朝何日追遊洗塵渴肩輿相訪不
須輶

浙水東頭佛舍連蒲菴上士坐忘年五雲古衲
層瀾湧百寶浮圖列宿躔牀上貝書多譯梵門
前海舶直通燕比丘喜得階蘭秀應種菩提滿
法田

九載違離得遠書幾更歲曆斗旋樞華星秋月
超元白峻領重江限越吳栢子樹陰浮碧砌蓮
花漏水響銅壺老夫素有林泉癖一曲何當乞
鑑湖

千里相望費夢思長江淼淼樹離離自收田秫
聊供醉誰采山芝獨療饑南服久尊居士室西
林敢擬太常碑懸知釋教雄龍象不待跌龜與
首螭

答堯叟御史兼簡翰林敬止諫掾終吉八首
東泛滄洲寺論文見老成雪髯秋更白風骨鶴同

清野服編荷葉山杯泛菊英肯從林下賞世亂且
逃名

南紀新峩豸居官不厭貧異才今獨見直諫古誰
倫花底青驄好棠陰白兔馴酒酣呼賀老筆陣掃
千人

河朔纏兵氣妖星近紫微雪營開虎帳天詔賜龍
衣稍絕蠻租貢頻驚羽檄飛知君飽經術報國願
無違

天啟中興運風雲六合隨假王南鎮久嗣王北征

遲終見車書混寧憂社稷危山林吾所好有約話
深期

翰幙知名久相逢語入微鳳毛池上有駿骨世間
稀頒詔從天下揚帆渡海飛
歸及早春色柳
依依

翟君江左士東越久離居避地儲無祿回天諫有
書近辭蓬閣吏欲問華山鋤笑我崑栖懶身閒不
願餘

江海誰青眼漂流厭戰塵作官南逐北防寇夕兼

晨鹿馬明欺世豺狼暗伺人紫芝香可茹丘貉且容身

老我清泉寺茶杯與飯盃觀心無別佛論道有通儒風鐸鳴空外天華落座隅南宗今莫振魔說可勝誅

附蘇天民八首併序

字堯叟保定人南臺監察御史

至正甲辰予以使事過四明院掾李仲彬致書於定水寺見心長老予素未及識至則訪之縉紳先生亟稱其才德俱高無不

樂道而與之游予心竊慕焉恨不一見爲歉越數日見心來城訪予湖心寓舍見心亦假館于東廡之別室相從談論接日見其樂易溫雅動容周旋超然有林下風致因出其所編澹游集以示予皆當代虞歐揭張諸先輩及時賢朝貴逸人高士贈答酬唱之作悉以道義相親而致景慕之意及觀所載請銘受業之先師收殯無歸之亡友編蒲菴以思母通唱和以納交與夫

起廢寺於喪亂之餘措身心於安閒之地
其設施行事則又有大過人者矣蓋古昔
懷才抱德之士與世不偶或厭塵勞而不
屑爲往往逃於空虛如慧遠道安支遁佛
印之流是也立微言勵高行卓卓然拔出
於塵俗之表又能從遊於陶蘇諸公以故
騰英聲於當代垂芳譽於後世愈久而愈
彰也見心其亦無媿於前修已乎此劉羽
庭所謂不爲法所纏縛而能出入者也適
院掾翟終吉以辭役來東鄞與見心交舊
見心將還山中握手有不忍別去之嘆乃
欲邀予二人同往予亦久厭塵囂思得幽
隱之地以息心養神柰以俗務鞿轡而未
果然心慕神馳有不能忘者也輒述成數
章聊發一笑

大德山靈護禪宮寶構成翻經磐石古洗鉢澗
泉清奉母編蒲屨延賓蕪桂英天香題丈室湖

海仰高名

悠然超物外補壞不知貧德義孚交友聲名邁
等倫石從蒼鹿卧池泛白鷗馴玄學通三昧如
師有幾人

見說雙峰寺緣溪一逕微泉香供客飲山翠溼
人衣老鶴依松立輕雲著樹飛高僧清坐久都
與世相隨

路入雙峰境逍遙杖屨隨定鍾鳴曙早梵唄出
林遲代步籃輿穩攀躋石磴危陶潛雖帶酒敢
負遠公期

與世相違久深居近翠微道流叅問廣俗客往
來稀龍入架沙隱鶴隨金錫飛禪龕如許借吾
欲遠相依

蒲菴龍象士避世愛山居靜刻蓮花漏閒看貝
葉書園葵和露摘畦藥引泉鋤放曠雲霞外心
清樂有餘

早棄人間事幽棲避世塵山林忘歲月鍾鼓樂
昏晨獻果猿將子聽經龍化人亂離無恐怖名
利不關身

明倫彙編
學業書千卷生涯飯一盂問叅多老宿交結總
名儒爲道資三益談玄舉一隅借師菴側地吾
欲把茅誅

寄何山堂上南洲法兄二首

南洲詩
另見

南望何山翠欲流諸天擁蓋雨花浮水精寒映千
江月帝網光含萬象秋聽法黃龍湖上起馱經白
鹿樹間遊近聞僧省多公道豈向高峰久滯留
松泉昔任海間樵折簡還聞遠見招江月一杯浮
汗漫山雲雙屐度岿嶷青精作飯朝頻喫紫芋分
盤夜共燒幾讀新詩煩慰藉臨風玉樹想清標

答愚谷元帥

楊家池館滄洲上鹿鶴來依動作群雨後苓香還
自斲霜前橘熟每同分衣冠舊續關西譜筆削新
傳嶺北文見說論功班上爵除書飛下九重雲

附楊貴亨一首

號愚谷天台人浙
東道僉都元帥

清泉老子多蕭散定起談空思不群一室天香
秋更好千林月色夜初分詩傳黃閣新題句碑
讀蒼厓舊勒文我欲相期傍幽隱經函松下共

看雲

德舉天使來自太原會予鄞之湖心寺蒙惠
詩遂次韵以謝

黃塵歲月苦駸尋激烈長懷報主心五色雲中頒
使節九重天上奉綸音吏迎官驛葡萄熟馬度秋
營苜蓿深解后相逢東海寺漚波千頃共清吟

附賈實烈門一首

字德舉真定人獲鹿人
鹿泉文正公之孫內史

院都
事

定水高踪何處尋雲林燕坐靜觀心虎來磐石
依禪錫龍出靈湫聽梵音月窟天香金粟老王
城祇樹寶花深遙知東澗蒲菴好擬着藤床夜
共吟

遊大慈山留題

同芝軒中丞伯防
工部仲能憲使

大慈樓閣被嵯峨暇日遙陪使節過一水天開湖
影濶萬松雲溼夜寒多佛巖白晝垂瓔珞相隴青
春長薜蘿聖代祇今勤外護叢林搖落奈愁何

附賈實烈門和篇一首

金刹蟠雲擁翠峩衛王祠下得經過六時花雨

天香滿萬壑芝烟玉氣多渡海有僧留杖錫歸
田無客卧松蘿三生欲問磐陀石塵劫茫茫奈
老何

德舉內史訪余定水山中以其先世文正公
所賦古詩十首命題其後文正公當中統至
元間以偉才雄畧佐世祖定天下其清慎廉
介尤爲太宗所稱後出鎮荆湖繼遷江西行
省叅知政事所至有惠政民皆圖像而祠事
之此詩蓋是遷江西時所賦也故有卜居鹿
泉懷處荆鄂之句當至元初南北甫定而荒
徼之氓或猶負固梗化公悉推誠招徠而撫
綏之由至元及今至正治將百年盜賊復大
起竊據郡縣而塗毒生靈有不忍言者安得
如公數輩叅錯海內以質中興之業哉撫事
懷人不勝淒斷故勉賦五十六字以寓余之
所感云

武皇開國混華夷公佐雄藩肅令儀勲烈已看垂
後世文章還憶重當時鹿泉風月歸吟咏鄂渚烟

明倫彙編
禮典典考
卷之三
三
霞入夢思撫卷只今重可感中興誰共濟艱危
德舉天使將還京師過余清泉徵語爲別遂
賦長歌以贈

鳳凰山人金馬客九重出入聲輝赫今年奉使經
南洋白浪如山蜃雲黑乞靈海神神扶持火輪晝
墮潛蛟螭一身萬里百感集赤心獨許皇天知國
家威靈重有賴頃刻鯨濤息澎湃乘流直遡蛟門
山三日揚帆北風快東藩丞相蒙國恩控鎮海島
綏黎元一見觀迎設高燕画堂絲竹羅盤殮我憶

相逢甬東驛把臂論交寫胸臆日月湖邊數往回
笑折梅花看春色重來訪我雙峰巔夜分芋火烹
清泉人間興廢何足較細說石上三生緣君家文
正國元老昔佐世皇事征討鹿泉買得桑麻田早
擬功成拾瑶艸今君嗣世何雄傑磊落青雲見高
節題詩每愛筆如椽抗疏還知心似鐵翩然北望
思蓬萊手持龍節東膠田天山只尺入眼底櫬捨
盡掃烟塵開我聞中興下明詔諸將論兵總英妙
知君入奏多良籌定有嘉名振廊廟鳳池天濶花

冥冥傳宣拜舞趨承明內官酒賜葡萄瓶稱觴激
烈歌太平

次韵答翰林承旨潞國先生

白髮河東叟虛游興未涯才名當世重功業後人
誇戀闕馳阿閣看山夢若耶恩霑天上露思繞洞
中霞錫爵曾分土傳宣屢艸麻風雲動鼇石奎壁
煥龍沙文許蘇儋耳交論鮑叔牙久知班玉筍還
憶賦瓊花直筆垂三史群書會百家學仙身已蛻
入佛語無華願我林丘老思君道路賒相邀徒折
簡遠泛欲乘槎觀世都如幻謀生祇謾嗟乾坤同
一寓日月轉雙車補壞從衣破歆顛任帽斜夜禪
依睹史朝梵禮耆闍講或趨龍象漁非捩蜺蝦自
甘冰齧蘂誰共雪烹茶臃腫材全棄胼胝足倦跏
何時留玉帶乞與佛袈裟

附張翥一首

聞道能仁叟高風播海涯道爲尊宿重詩許大
方誇裁鑑真圭玉機鋒古莫耶幽禪寄巾錫微
思入烟霞經舊繡新鈔厨香飯

寺法界徧河沙佛現騎師子蠻來進象牙人尋
彼岸筏天雨滿筵花儒墨雖殊軌文章本一家
諸公各吳會獨我久京華圭組身猶繫山林跡
尚賒昔如櫟社樹今作汎流槎隔歲纔音問臨
風每嘆嗟敢期分半院終擬覓三車衰疾才全
退眊昏字易斜視身猶土苴應物且蘭闍舉世
狼依狽從誰蛇目蝦遠公休禁酒顯衲要分茶
筇杖閒扶老藤牀靜結跏屈眴吾已辦早晚製
袈裟

答西亭文學

穿楊曾憶賦凌雲早有聲名浙下聞北闕欲瞻龍
鳳質南天尚阻虎狼群題詩竹裏聽春雨把酒花
前醉夕曛近喜黃麻新拜命虹光千丈煥奎文

附楊彝一首

自別京華戀白雲姓名那得廟堂聞吹噓不待
河東賦顧盼俄空冀北群往事關心驚逝水長
吟搔首對斜曛故人林下曾相約莫遣山亭便
勒文

寄彥明中丞二首

三月扁舟渡鑑湖
棟花風急雨晴初
共知出處心無愧
自信經綸志未疎
海上雲霞明繡斧
人間奎壁煥圖書
中興近報王師捷
徵詔行看下玉除
郭外行窩竹樹深
登臨渾似越山陰
碧筩飲罷月生浦
白紵歌殘風滿林
亦有支公邀共講
可無賀監許同吟
相過不負高秋約
重賦天香答賞心

附月魯不花二首

每見詩文湖海上
前年相識北來初
客邊解后情何密
方外交游跡似疎
師喜已通三藏法
我慚未讀五車書
新秋欲赴雲泉約
一榻清風萬慮除

玉立雙峰古寺深
團團桂樹結清陰
編蒲盡孝追尊宿
製錦成文重士林
常日談經山鬼聽
有時持鉢洞龍吟
遠公曾許淵明醉
又寄詩來動客心

附烏本良二首

去年曾共看芙蓉
今日秋風落木初
只道錦幪

明倫彙編
遊處熟豈知金策出林疎奉親獨比陳尊宿訪
古不忘虞秘書欲過山中聽軟語幾番西望立
階除

橐駝峰下路幽深翠靄飛來白晝陰老衲候人

登石嶺中丞問俗到山林睦州蒲向閒邊織祕

監詩從定後吟月窟天香如昔夢室中談笑想

同心

中丞赴舉時先一夕主文龍麟洲先生夢
月中有花及公魁右榜名與夢合今師以
誠齋楊文節公天香來月窟之句扁室
而中丞造焉又與主文之夢相合故云

附烏斯道二首

一別老禪三載餘每懷溪上笑談初春山細雨
霑烏帽晴日閒華墮碧疎九日登高曾有約二
王小楷未能書至今不到天香室深媿埃塵少
滌除

矯首令人感慨深浮雲蔽日閣曾陰六時花散
金銀剝千里塵飛劍戟林經罷看山長獨坐定
圓倚石自微吟絕憐松下清冷水好與人間洗
渴心

附迺賢四首

月僧弘秀集
卷三
七
託交湖海十年餘重見情同握手初尉藉獨看
方外好笑談頗覺老來疎久知齊已憐茅屋更
愛高間善艸書一夜秋風吹桂樹天香搖落滿
階除

山中書至寂情
相招坐竹陰內相才華
專北省上人行業著東林月明莫惜移床飲雨
罷須同曳杖吟便著青鞵過泉上請師與我早
安心

生涯老去一茅廬白髮南歸賦遂初夜半竹窓
燈澹澹秋深山葉雨疎疎金人已分三緘口玉
陛無由再上書慙媿衰殘等樗櫟敢將寵辱較
乘除

寓直曾依玉署深高槐合抱晝陰陰百年人物
多清選千古文章重禁林雨潰鼇峰漫舊刻霜
摧鴨脚動新吟白頭歸卧滄江上戀闕空懸萬
里心

附桂惠稱二首

熊車遠過清泉寺正值西風白鴈初翠掃苔花

明倫彙編
當戶靜香分桂子落林疎馳情北闕愁多夢得
句東軒醉自書忽報綸音來日下豺狼當道熹
先除

上人宴坐翠微深祇樹秋高碧殿陰嵐氣朝來
侵壞衲溪聲夜半出長林一尊獨許陶潛醉七
字真同越徹吟已悟浮生如夢幻閒雲流水自
無心

附桂如祖二首

星動蓬萊候使車金銀佛寺桂花初喜瞻上相
威儀盛深媿狂生禮法疎甘露凝香瑤席酒鄉
雲絢綵錦箋書座隅屢沐垂青盼敢頌明廷錫
峻除

禪伯閒居寶地深白雲滿室散清陰石龕虎跡
留苔蘚鍊鉢龍光出樹林曉座雨花僧共講夜
窓燒燭客同吟瀛洲學士清游處何日重過遂
風心

次韵芝軒中丞四首

南遊吳越北青徐歷覽名山千載餘醉解肅霜留

客飲賦成嬰武課見書辭官共熹全高節避俗寧
愁久索居自昔多才爲世用長揚諫獵重相如
歲月催人任疾徐論心且共樂三餘吹噓早有揚
雄賦慟哭寧無賈誼書京闕漫勞星使召田園欲
學野人居掌珠新捧應貪看天上麒麟画不如
荆揚烽火接南徐郡邑頻年戰伐餘諭蜀漫傳司
馬檄平蠻誰賜尉陀書公私征斂多乖治民庶流
移少定居憂國早知心獨苦秋風兩鬢雪霜如
曾陪驄馬步紆徐東澗尋幽數里餘愛酒每從花

下酌題詩多就竹間書江關未息豺狼鬪林洞還

依鹿鶴居寂憶文章揭工部閒心早與白雲如

附月魯不花一首

至正乙巳秋八月訪見
心禪師於定水出翰林

歐虞諸公往來詩文皆當代傑作也歎賞
久之因語及同年禹實監州將挈家赴任
客死于鄞貧不能喪見心買山以葬使其
存歿皆有所託感其高義因成一律以謝

名山登覽意舒徐不覺留連七日餘童僕飽餐

香積飯主賓閒閱翰林書買山塋友開神道度

子爲僧奉母居方外高風敦薄俗同年感激更

何如

附揭泐一首

金門獻策異嚴徐家世煌煌閱餘綱紀肅清
中執法銓衡平允部尚書自從抗節霜臺日遂
有閒情山寺居况遇道林多雅致共談性相悟
如如

附迺賢一首

憶昨蒼龍在執徐芝軒燕客素秋餘錦囊傳看
中丞笏玉匣關評內史書天上九門頻入夢山
中半院許分居解纓且濯滄浪水坐對壚薰只

宴如

寄上玉山處士三首

不到東滄十二年艸堂梧竹故依然丹經只許山
人讀璞藥多從海客傳瓊樹著花明似雪金壺盛
酒美如泉遙知別後風流在長醉青春玳瑁筵
雲霞剪就衲衣輕曾熹逃禪早避兵賈島未忘林
下約湯休豈戀世間名石牀花雨經函祕水殿荷
風梵唄清應共龍門采樵者詩筒來往寄閒情
浮玉山前種紫芝松雲蘿月共幽期封侯不羨黃

金印對客長歌白雪詞柳浪平湖春放棹花陰圍
座晝彈棋從游公子多才俊不寄新詩慰別離

附顧阿瑛三首

前者鳳庭上人還山曾次
韵所寄元璞師三詩爲四

大安隱之問想達机格區區流寓異鄉守
道度日一閒之外無以爲故人道又承貽
詩存問多見不忘謹次韵
奉畲聊代書耳幸冀一笑

鴛鴦湖上住三年每憶僧中有皎然路遠夢憑
蝴蝶去江空信斷鯉魚傳問人盡說山藏寺卓
錫應知地湧泉未得青鞋滄海上燒香白日散
花筵

無官身似一絲輕閒却胸中十萬兵爲愛淵明
能入社獨憐靈運不逃名敲門看竹題詩徧煮
石煎茶汲井清廷尉雀羅今可設死生誰復見
交情

神山處處產神芝獨有神仙不可期賈誼過秦
曾著論息躬絕命亦摛詞千年離合雌雄劍一
著輸贏黑白棋多少英雄皆鬼錄天年全付病
支離

次韵答芝軒中丞二首

蓬萊高閣倚清風
 驄馬曾看度越中
 每憇放歌回剡
 權何須沾酒憶
 郛笳月中花影
 符秋夢天上奎
 文貫夜虹此日
 東游尋舊約雙
 峰惜別苦忽忽
 脫巾林下灑松
 風坐挹湖光似
 鏡中萬斛黃金
 蒸桂子一杯清
 露飲荷筩綉衣
 執法光扶日綵
 筆題詩氣吐虹
 雲樹芝泉重有
 待東歸行李莫
 忽忽

附月魯不花一首

余來四明見心禪師以詩見招既至山中使人

應接不暇見心相與數日抵掌談笑情好益洽故再倡秋風之句為他日雙峰佳話云

相過有約待秋風
 今到招提八月中
 已遂登臨陪杖錫
 不煩來往寄詩筩
 雙峰對立開金粟
 兩澗交流貫玉虹
 政好雲泉共清賞
 江頭歸櫂又忽忽

泛鳴鶴湖二首

芙蓉水淺漾蘭舟
 白苧涼生秋氣浮
 漫把天香來月窟
 曾誇春色占鼇頭
 山林舊好從疎散
 江海微蹤歎謬悠
 却憶杜陵詩句好
 西枝每為贄公留
 鸚鵡鳩鵲旁釣舟
 明湖如練水光浮
 故人供饌憐

明倫彙編
青眼父老迎車愛白頭四海風塵長袞袞九霄雲
鶴自悠悠江山有約應重到莫厭東南久滯留

附月魯不花一首

杜若湖中試綵舟波光千頃鏡奩浮芙蓉露冷
滄洲上楊柳風清古渡頭鳴鶴數聲秋澹澹閒
漚幾點思悠悠相過未盡登臨興更把琴書且
暫留

次韵答伯防工部

放舟鳴鶴渚海濶青山長舉雲陟崇崗泛月經白
洋悠然發遐思飄飄遡流光采掇幽蘭花永言佩
孤芳眷茲同心人高風邈難忘廟堂豈不樂於焉
此徜徉終當贊皇謨以慰蒼生望浩歌起寥廓六
合風浪浪

附揭泐一首

平湖古寺東演迤十里長上人憇我至相攜泛
汪洋發棹晴宇動浮雲亂波光泐堤攬寒綠傍
渚舉幽芳景會願已愜趣深慮俱忘始游本避
近清賞成徜徉日落漁艇集隔浦遙相望塵纓

一已淨無用歌滄浪

答元璞

元璞詩
另見

吳天東蹴海相望聽潮音渚白虹流玉江明日湧
金室依祇樹好幢擁雨花深長憶芭蕉底袈裟坐
綠陰

游天童山

九隴峰高列翠旗諸天幢戟寶花垂帝青倒影浮
春殿太白流光落夜池供佛遠分天上鉢朝元新
勒賜來碑重游熹得陪驄馬拄杖看雲共賦詩

附月魯不花一首

山盤九隴翠峯巖太白星高手可招路入松關
雲氣合天連寶閣雨花飄承恩賜額開名剎奉
勅文碑荷聖朝晨鼓暮鍾思補報行看四海甲
兵消

夜宿大慈山次金左丞韻

南渡招提覓舊游層臺高出翠微幽白河影落千
峰曉碧海寒生萬壑秋月滿諸天雲葉散風清大
地雨花稠人間有路通兜率莫問仙家十二樓

附月魯不花一首

大慈名勝舊曾游路轉平湖景寂幽崑下珠瓔
時散彩林間石馬尚鳴秋昔扶紅日勛勞遠今
見青山艸木稠把酒不須評往事海風吹月上
西樓

游育王山次芝軒中丞韵

鄖峰形勝甬東傳殿角高開歷有年設利湧壘紅
貫日靈鰻出井雨垂天銜花鹿卧金沙上掃葉僧
來玉几前清賞自慙違使節袈裟歸泛月湖船

附月魯不花一首

育王名刹古流傳鐙火于今幾百年舍利有光
垂半榻雨花無數散諸天鐵輪高揭晴軒外玉
几端臨寶閣前寂憶能吟澹游叟東湖先渡月
波船

彦良文學寄和陶詩次韵二首

誅茅獨我久安禪辟穀多君欲問仙是處黃塵猶
蟻戰何時滄海共鷗眠巖間分芋寒留火溪上栽
花曉引泉有酒且須謀一醉肯如彭澤嘆無錢

明倫彙編
事考典
卷三
三

避俗無營獨賴詩清狂頗覺老來癡春吟柳外迷
行屐夜醉花前倒接籬遠信漫憑黃耳送閒心只
許白漚知近聞新下求賢詔聖主恩深及四夷

附桂惠稱二首

重憶雙峰一老禪詩名曾動玉堂仙天香滿室
秋多思明月當空夜不眠爲母編蒲營別業延
賓煮茗試清泉高情能念陶彭澤莫惜時時遺

酒錢

酒酣捉筆和陶詩不覺旁人笑我癡夏日吟風
眠北牖秋霜采菊過東籬田園樂趣嗟誰識形
影相看只自知漫爾成編愧疎率敢煩一一爲
芟夷

衡山福巖寺二十詠

船若寺

大士談空般若臺三生結願剪蒿萊寶輪宮殿蟠
雲起帝網山河照日開巴蜀馬師傳道至洞庭龍
伯護經來袈裟我昔依禪觀幾聽微鍾夜定回

天柱峰

一柱通天鎮火維層標拔起勢孤危翠摩日月蟠
三楚影落沅湘帶九疑羅漢時來垂白鹿祝融晝
下閃朱旗神燈夜夜朝金刹知有高僧禮六時

退道坡

石作高坡橫紫煙巉崑直與五峰連百盤下壓龍
湫嶮一峽中通鳥道懸人度湘潭經犖确僧歸嶽
寺上夤緣倦游多少迷途客絕頂誰知別有天

開虹橋

虹橋飛影跨崔嵬上接朱陵百尺臺直礙青龍連
海起空瞻烏鵲渡河來霧迷長恐山無路雨漲還
驚瀑似雷試問清湘題柱客誰憐司馬獨多才

兜率橋

縹緲垂虹映日開梅檀樓閣共崔嵬山圍紫蓋蟠
孤柱路入銀河接上台五百梵僧鳴錫度十千天
子散花來梯雲不用朝闈闔飛步高登彌勒臺

八功德池

八功池水雲泠泠源出金沙泄地靈流處汪洋通
大澤酌來清冽勝中濡三秋影落天河白一派光

明倫彙編
涵嶽雨青我昔西方曾灌沐蓮花香裏聽談經

嶽心亭

虛檐靈氣翠網縕鎮嶽中居遠俗紛下直離宮蟠
地軸上通斗極應天文窓含楚月三江迴門俯湘
雲七澤分釋子僊翁共來往松蘿吟笑日爲群

擲鉢子

鉢峰青覆祝融西曾覓靈踪上石梯夜見神燈天
外落晚聽仙鳥雨中啼空餘化飯來香積遙憶徵
書降紫泥鐵券不磨前代敕采芝誰共羽人栖

目雲亭

目雲靈嶽悟心空妙語傳來識寶公燕坐六窓無
壅隔冥觀萬象自靈通諸天日月空濛外大地山
河隱見中一口盡吞三世佛至今龍象仰高風

迎雲亭

亭上閒雲盡日飛卷舒無跡映山輝晴隨海鶴凌
風下暝逐湘龍作雨歸縹緲或乘僊子蓋空濛長
溼定僧衣何當散作明時瑞五色輪囷遶紫微

磚鏡亭

寂勝幢高擁象筵馬師曾此悟机緣磨磚謾說能
成鏡作佛應知不離禪洞視太虛無影跡照空諸
相絕媼妍金鷄早應多羅識誰信曹溪有別傳

定心石

巍巍磐石倚屏顏高壓衡雲鎮祖關劫燒無痕平
似砥虛空不動兀如山拂衣僊度諸天近習觀僧
來白日閒共說磨磚曾得旨馬駒蹤跡遍人間

隱身崑

真僧岩洞嶽雲連九夏深居記昔年日射寶珠龍
問法風鳴金錫虎依禪菩提子落磐陀石優鉢花
香瀑布泉凝借一龕相近住石橋方廣聽松眠

煨芋崑

雙石爲門薜荔懸瓚師禪隱記當年長鏡曉斲蹲
鳴雨新火寒吹楮柚煙飛蓋嶽君時聽法擁爐山
客共談玄不知天上來丹詔鼻涕垂願日晏然

讀書堂

水繞石門花繞渠芸香曾是鄴侯居白衣不作山
中相黃卷空留架上書經國有才心獨苦畫灰無

明僧弘秀集
語意何疎至今紫蓋峰前人憶絃歌尚駐車

御書閣

上方書閣鎮山靈金榜高開九疊屏五夜文光煥
奎壁六時花雨落青冥龍香賸貯親題字翠石多
傳舊刻銘此日王臣勤黼黻重看賜札下彤庭

大慧塔

天柱峰頭古道場盤盤石塔跨穹蒼琅璫風外傳
靈響舍利雲中放寶光鼓瑟湘君時護繞吹燈山
鬼夜潛藏法輪寂勝應重轉花雨繽紛滿上方

止南寮

南公風骨世應稀昔隱崑房傍翠微早識泐潭爲
死語終從衡嶽悟生机窓當瀑布珠璣落座擁山
屏錦綉圍莫話韶陽舊宗旨至今雲月爛相輝

藏雪寮

嶽蓮浮翠入軒墀蒲榻曾延雪竇師諸部遍繙娑
羯藏百篇惟讀貫休詩虎馴樹底安禪石龍護花
間洗鉢池遙想當時清盥罷雲窓長日望峩眉

冰雪菴

明僧弘秀集
北山老禪冰雪容菴居瀟散絕塵蹤心清渾在水
精域定起或游天柱峰禪榻看雲惟旁竹經函待
月獨依松遙知越徹同高潔我欲談詩一過從
余住定水暇日因賦禪偈八首聊奉雲水高
士禪餘清供

山中行 烏藤倒握任縱橫心閒不預人間事
身老都忘世上榮朝出還看流水送暮歸仍愛
白雲迎休問利莫貪名旋敲石火煮黃精從來
有口無言說分付松聲與澗聲

山中住 盤陀石在雲深處眼看貝葉兩三行
手種曇華千萬樹粟畝開得更須鋤茅屋破來
還旋補莫分賓休說主白石清泉飢可煮相逢
有問祖師禪熟喝如雷棒如雨

山中坐 年深莫管蒲團破飢飡渴飲只如常
放去收來無不可乾坤每向鉢中藏日月任從
檐外過取無人舍無我知音自有松風和翻身
靠倒五須彌驚起西天胡達磨

山中臥 只將四大爲床座杖頭不掛青蚨錢

爐內常存黃獨火無聲曲聽木人歌落韻詩從
石女和莫談因休論果兩脚長伸隨分過豁然
開眼日頭東推倒嵩山破竈墮

山中富 鹿鶴相隨多伴侶錦繡霞明萬圃花
珠璣瀑瀉千崑乳無著無貪只自知有作有爲
翻是苦益非添損非蝨月白風清共朝暮識得
分明不外求世上黃金如糞土

山中貴 萬象森羅皆侍衛日映朝霞五色衣
雲籠磐石千金位任從觸戰與蠻爭那管龍吞
并虎噬辱不憂榮不喜鍛聖鎔凡成活計有時
棒喝相交馳佛來祖來也須避

山中貧 賣無寸土寄閒身百寶任裝新佩帶
千金不換破衣巾滑炊菰米堪爲飯香織蒲花
可作茵順莫喜逆莫嗔從來用舍絕疎親要知
至寶元無價月色泉聲別是春

山中賤 補破遮寒足餘願無心元不競錐刀
有口何曾說軒冕倦來問訊少低頭老去論交
多冷面樂休誇苦休怨眼底浮榮如露電等閒

撥轉金剛輪堂堂獨坐空王殿

余既賦前偈八首客有讀之者因質予寒山詩一集求剖其義余媿無以喻之故重賦古詩四首以答其請且以寓予意焉

我有太古鏡得之空劫前不假磨瑩功體妙絕方圓虛明吞萬象洞徹媮與妍昧者弗自見往往成棄捐獨有老盧師玄覽真超然匪資拂拭勤遠紹衣版傳

我有太古劍湛湛秋水光神功奪造化鍛鍊非陰陽一揮動山嶽百怪俱潛藏世人不自識冶鑄誇干將殺活貴善用豈犯鋒與鏃取之莫可名強曰金剛王

我有無價珠神光炤天地迥絕表裏殊圓明脫塵翳徒誇驪頷珍自與魚目異趙璧莫能沽賈胡焉足議紛紛貪愛流豈識衣中繫返觀須自知勿使長淪棄

我有無文印今古常昭然妙質匪金玉至功絕雕鐫舉世重符璽共誇權令專嗟哉大如斗纍纍空

明僧弘秀集 卷三
自懸誰能獨佩此用之恒不偏印空兼印泥全超
衆象先

初度日次伯防工部韻

幻游天地寄南垂野鶴孤雲只自隨身本無生那
問壽句因有法漫論詩梅花夜月思君處桂子秋
風別我時想見歸朝多獻納總將道德贊鴻釐

附揭法一首

祥光慧景起東垂坐擁諸天萬法隨海外高僧
來問偈日邊過使請題詩蒲庵月滿思親處桂
室雲生出定時悟得佛中無量壽好將清泰祝
皇釐

南臺中執法芝軒先生余澹游之知己者寓
居四明嘗訪余定水山中游詠泉石翛然有
忘世志自是書問往來無虛月至正乙巳秋
七月內難平而公家書至自京師喜而有賦
且錄以示余遂次韻四首奉答

山擁蛟門海氣陰蓬萊北望獨關心天開日月明
黃道地接風烟暗綠林去國盡懷三獻玉歸田誰

散二疎金臥龍有策終扶漢莫道空爲梁父吟
辭官不住越山陰慷慨長懷濟世心諫草舊聞通
紫禁宮花曾憶燕璫林名家喜有春秋筆儲索知
無暮夜金此日東游真汗漫滄洲明月聽龍吟
五雲迎日散秋陰優詔歡傳慰遠心星使北來車
似水天兵南下羽如林策談經濟輕千石書到平
安值萬金早晚東風催入覲鳳池春暖看花吟
澹游亭子澗之陰瀟灑曾論物外心樹繞杪羅雲
滿室花開落葡萄雪成林解兵會見鳴空錫說法誰
分布地金最喜賢良爲世瑞琅玕芝草動新吟

附月魯不花一首

余嘗遣僕奉商學士山水圖一幅爲見心禪師壽又嘗與師同宿大慈山和金左丞壁間所題詩韻而師有白河影落千峰曉碧海寒生萬壑秋之句故未章及之

慈雲高閣起層陰中有蒲庵老見心海內才名
通翰苑江南聲譽冠叢林寄詩常愧刊文集送
画何煩贈屨金前月清游得三友寒生萬壑最能吟

次芝軒中丞韻二首

明倫彙編
三
執法南從越絕居繡衣光彩照坤輿黃金遺子無
私橐白髮匡君有諫書遠捷已飛江上羽羣凶真
作釜中魚歸朝定策中興業笑我山林與世疎
憶昨尋君北郭居東風花底度籃輿看山拄笏春
哦句臨水鈎簾晝讀書已戴峩冠欣有豸不彈長
鋏嘆無魚澹游它日應同社莫遣雲泉音問疎

附月魯不花一首

避地東鄆郭外居坐無齋閣出無輿雲山滿眼
常觀晝烽火連年近得書住久頗能評海錯交

深多感餽鱸魚

近得家書是日羽庭餽鱸

論文政欲頻相過

門掩清風客到疎

題高節書院

漢主中興討不庭已隆文治去繁刑羊裘獨釣桐
江雪象緯空占帝座星越絕有祠嚴祭祀雲臺無
像列丹青登臨不盡高風詠寫徧烟霞九疊屏

附月魯不花一首

遠聘羊裘到漢庭竟忘龍袞略儀刑先生不爲
千人爵太史何勞奏客星潮上嚴灘浮海白山

連禹穴入青雲高風千古成陳迹唯有荒祠繞
翠屏

寄題合溪別業二首

草堂合溪上雲石淨無氛春水鱸三尺秋風鶴一
羣行廚依竹見吹笛隔花聞最喜逃禪好團蒲擬
共分

不食諸侯祿閒居避俗氛岼花紅作陣沙鳥白爲
羣貝葉風前讀菱歌月下聞清游難再得愁絕一
江分

附顧阿瑛一首

玉山中亭館折毀殆盡僅留一草堂耳却與合溪營

一別業頗幽寂向有五言一首因錄以上

我愛新居好蕭然絕世氛路迴青草岼水合白

鷺羣野色排簷入書聲隔竹聞是中多雅趣難

許俗人分

此詩和者不下百家好者甚少須吾見心老
師一出奇語可也此地多水非浮杯汎舟者
不可到由是得終日閉門讀三教書然閱佛
氏書爲尤多頗於生死理有悟入然近爲于
道士彥成先我一步於去年十一月三日端
坐而去顏色如生手足柔軟臨終所說者皆
佛事聞見者莫不驚羨斯人亦吾師舊友故
敢以告阿瑛近亦刊暮雲集乃兵後與仲舉

學士往來詩文完時亦送上求題吾師所賦
禪偈八首讀之如在禪林中行住坐臥也且
晚亦當奉和求改是矣二月
五日白衣交顧阿瑛和南

見心名來復自號竺曇叟豫章人受法于

徑山南楚悅公住雙峰古清泉寺寺距慈

溪縣四十五里鳴鶴山之陽橐駝峰之東

後改爲定水教忠報德禪寺故贈篇多稱

定水自稱定水毗丘又結蒲菴闢天香室

徵辯室清泰堂其詳見歐陽張揚諸記銘

中國初以高僧召至京師與全室泐公夢

觀仁公齊名余選全室夢觀二集列諸卷

端惟見心寥寥深爲歎惋忽童子從殘書

堆中搜一冊以進曰似洪武間板惜頭尾

俱脫中有釋子詩未知可備采否閱之正

見心澹游集也自是三僧鼎足而立矣澹

游乃所居亭名因以名集凡三卷蓋集郵

筒往來詩文惜腐爛不堪著手亟倩能手

用裱古画法葉葉托出選若干首雖未窮

星宿海已吞雲澤八九矣凡元末羣公倚

和投贈諸作別本罕見因錄其一二

無二一首

皇帝躬率舟師至鎮江浮子門受降僞吳旋
師駐蒜山下幸拱真菴賦此以獻

天人西來乘赤龍手握寶劍青芙蓉出師百萬皆
英雄四方上下雲相從大船椎鼓聲雷同斬蛟射
鯨滄海中須臾日出扶桑東波平浪靜天無風歸
來奏凱登九重斯民有賴歌年豐祝皇壽比南山
崇邦基永永傳無窮

無二名師一拱真菴僧戒行精嚴人稱法

門梁棟時僞吳張士誠遣戴院判入寇

太祖高皇帝躬率水師追至浮子門

其衆凱旋至京口駐蒜山下幸拱真菴大

閱師獻詩 上見出師百萬皆英雄四方

上下雲相從之句大悅或作惟心悞

默堂一首

天香室爲定水見心和尚賦

天香蘭若倚高岑雙桂花開秋正淡鶴唳空山涼

月白龍歸古洞碧雲陰一窻風雨高僧定滿壁珠
璣好客吟拄杖何時問幽寂梅檀林下遠相尋

默堂名文靜閩中人住越之天章寺嗣法

金山卽休了禪師 慈溪雙峰曰定水禪

寺自唐以來主僧往往知名宋廬陵僧德

璘與楊文節公爲方外交寺有古桂二章

至秋花最蕃德璘嘗蒸花爲香以餉公公

酬以詩有天香來月窟之句見心來主是

寺念前輩之流風闢室而名之曰天香一

時題詠者甚多緇流惟默堂雷隱二人如

左丞周伯溫云仙桂本是菩提樹根在廣

寒雲霧中四明桂懷英云金粟秋蒸雲滿

屋鉢衣夜定月當空金陵燕叔誼云曉攀

每覺雲生袖夜賦何妨月到筵燕山阿魯

溫沙云談經花雨飄金地入定天香滿翠

微皆佳句也

雷隱一首

題定水見心和尚天香室

上界金銀開佛宮六時鐘磬度溪風空生宴坐寒
崑下天女散花明月中石几爐烟秋澹澹碧窓香
霧曉濛濛幾時乘興登鳴鶴與子夷猶桂樹叢

雷隱名良震閩中人住上虞之等慈寺嗣
法徑山元叟端禪師腹聯云石几爐烟秋
澹澹碧窓香霧曉濛濛可與周道立冉冉
天香生靜室濛濛花雨落經筵並讀

用堂二首

思親

憶別長汀十二秋羈孤江左謾增憂寒蒲雨足橋
南浦新筍春生舍北丘破衲一身雲渺渺寸心千
里水悠悠鄉書莫寄南來鴈堂上慈親已白頭

金陵行

從古佳麗金陵州到今城郭枕江流埋金往事墮
茫昧含風老樹長蕭颼寒潮喧聲響西浦碧海渺
渺天東頭二水三山涵遠景龍蟠虎踞橫高秋黃
旗紫蓋化榛莽庭花玉樹傳商謳六帝雲浮幾蒼
狗三國角鬪真蝸牛青山似洛祗復歎神器歸隋

良可羞鳳凰何來栖李樹漚鷺戲浴彌滄洲天塹
已知徒恃險地肺只合從仙游君不見昔人黍離
歌宗周彷徨不去心悠悠天荒地老著許愁日往
月來無時休霜飛臺高柏修修人謂我歌將何求
用堂名子榎嗣法元叟禪師是詩後自綴
數語云故人與祖庭見訪以定水見心和
尚送行序示余讀之再三然大意在歎舊
懷賢悲惋不已予就以向嘗所賦金陵行
書於卷末以露醜拙其所興感其致一也
祖庭倘回定水煩呈竺曇翁爲加潤色所
著有水雲亭小稿宋潛溪先生序云余在
金華山中觀蛻巖張先生集有跋夢堂噩
公用堂榎公吳中唱和卷後其言曰詩家
寥寥叢林有人殆與唐皎宋潛方駕余竊
以謂夢堂之詩幸已見其一二矣而不知
用堂所賦爲何如意其必高爽而絕塵者
乎不然先生何爲以如晦寥寥擬之也及
來南京獲與同堂會於護龍河上間出詩

文一帙所謂水雲亭小稿者俾余序之非
惟其詩可稱道如先生所示其文亦淡穩
平實而多言外之趣因竊自歎方外之人
其用志不分乃能如斯之工也用堂族陳
氏古靈先生之諸孫今居四明嘗掌內記
雙徑已而分座說法緇素咸服出世鄞之
護聖奉化之清泰凡禪林若古鼎銘公笑
隱訴公斷江恩公儒林若袁文靖公揭文
安公黃文獻公皆嘗叅叩及交游云

南洲二首

答定水和尚

西江一派接天流浩浩東南日夜浮寶地珠宮金
氣爽神山碧海玉壺秋翰林雲錦時相寄覺苑麟
龍日共游猶有凌霄遺業在未應定水得淹留
芳林幽谷混漁樵國士筵中肯赴招天上簡書何
絡繹雲深島嶼自岿巖詩篇每向閒邊寫香篆常
於定後燒宗社人材還可數惟公玉立聳巖標

南洲名文藻溫州人住湖州何山禪寺故

明倫彙編
定水贈句云南望何山翠欲流諸天擁蓋
雨花浮又云水精寒映千江月蓋謂嗣法
於月江印禪師也同時有兩南洲俱在浙
中一名溥洽蓋洪武初赴召後主報恩
寺稱爲高逸者也詳見別卷

行中二首

次韻芝軒中丞題高節書院

巢由不肯集堯廷復見先生肅典刑建武已恢炎
漢祚富春還隱少微星至今江水涵虛碧終古羊
裘照汗青政詠清風仰高節蒼茫寒日下雲屏

送柳仲脩宣便還省

三月江城花滿烟沙頭樽酒送歸船風流獨羨薇
垣客文采還推柳子賢秀水雨餘波渺渺吳門雲
盡月娟娟莫忘白髮鄉關友尺素時憑錦鯉傳

行中名至仁自稱熙怡道人江右鄱陽籍
元末住紹興府崇報禪寺洪武三年吳郡
虎丘寺以逋負事藉於官四年復爲寺師
來主法席以振宗啓後爲已任施者雲集

明僧弘秀集
百廢具舉真國初開山第一人也師工於
詩文嘗作黃州東坡祠記虞文靖公極稱
賞之又撰楚石和尚行狀云浙水東西被
召者凡十有六人余與西齋琦公夢堂
噩公與焉余始在徑山與西齋交甚契而
同稟法於元叟和尚

德岳一首

向識定水宗師於吳會雙峩奉別已十八年
矣因成一律

卓錫甬東山水窟白雲長與德爲鄰鶴鳴峰頂不
驚定龍拜室中能化人海氣晝寒濤卷雪天香秋
淨月垂銀雙峩尚憶相逢處詩寫珠璣照眼新

德岳名淨行姑蘇人住嘉興招提華嚴教
寺嗣法獨芳蘭法師洪武十二年于蘇州
報恩萬歲教寺重堦釋迦文佛臥像宋文
憲爲碑銘稱師樹教基續慧命有功於法
門甚大又云博通帝心雲華賢首清淨定
慧諸家書力振其宗于將墜之時一彈指

間悉起諸廢

大章三首

答定水堂上和尚次韻

兵塵十載暗滄洲
矯首東南憶舊遊
夜壑松濤驚別鶴
春江柳色映眠鷗
天香滿室澄還寂
澗水涵空湛不流
車馬擁門多慕道
雲興百問若爲酬

送王宗禮尚書趣運還京

轉海雲濤萬里賒
長風指日望京華
南州已入諸侯貢
北極初回奉使槎
內燕宮花迎馬酒
御溝官柳拂龍沙
從容好奏安時策
遂見車書混一家

次韻畬慈元怨

茅屋住在清江曲
瀟灑渾無俗
客過流水自懸春
藥碓落花閒度煮
雲鍋不耽玄石三年酒
只賦梁鴻五噫歌
退食歸來塵事少
舊游回首隔風波

大章名曩墳丹丘人住吳郡南禪寺鄉人
楮守行以金銀若干寄託而守行坐事家
破身亡子德困戍永平大章不遠三千里
負其物抵戍所還之後居天台之五峰命

其室曰白雲僧舍誠意伯為之記

大材一首

答定水堂上見心和尚

時危無計訪瀛洲何處山川可浪游天外羽書勞
傳馬江間戰艦避沙鷗正思蓮社香雲滿未覓桃
源春水流東望雙峰情似海乘桴擬欲共賡訓

大材名處林天台人

白雲四首

題東山洗屐池

和蔣東濱韻

謝傅當年愛此山鑿池洗屐碧巖間西邊塵土茫
無際南眺峰巒近可攀折齒曾為天下憇躡雲幾
向月中還臨流濯足思高潔千載清風在故關

梅花道人墨菜詩卷

已有食肉相青菘且自我丈夫成事業都是菜根
來

續蘭亭會

補任城呂系詩

疇昔有懷陰雨翳霄相爾居室忽焉終朝際此晴
煥散豁林郊潛魚泳波遊羽鳴條

明倫彙編
崇阿撫神秘微風扇和淳靈雨旣云沐品彙區以
陳蘭茗擢中沘葩萼媚方辰散懷得真契引觴答
熙春

白雲名自悅天台人建玉泉菴于燭溪戒
行高潔餘姚郭外孔道舊有善政橋潮汐
奔潰不能置一石師矢願重建祝天少却
潮勢竟累日平流乃併力基之橋始克成
邑人永被其澤洪武初被徵見 上講無
祀鬼神論稱 旨後 賜埽住杭之靈隱

及示寂有堅固子嘗讀陶學士高節書院
記畧云高節書院奉子陵嚴先生之祀在
餘姚州東南十五里重山環合巒飛嶂躍
邃林豐艸蒼翠炫日粲山霄地勢前低後
崇棟宇雖不高大葺理嚴潔門屋四楹中
建大成殿兩翼短廡殿後子陵祠塲衣冠
像後漢書逸民傳稱先生會稽餘姚人耕
于富春釣于嚴瀨年八十終于家其墓在
書院右蓋書院因墓而立以祀先生時老

儒趙君嶂與圓智寺僧蔡鉄舟善勸掃一
室留余居焉法性寺住持悅白雲穎慧能
文每訪余聽談易達旦忘寐留戀不能去

宗元八首

次韵定水竺曇和尚所賦禪偈八首

山中行 石橋窅窕連雲橫烟霞泉石自可樂鍾
鼎玉帛何足榮木客臨流或長嘯山獮抱子時相
迎本無相亦無名掃除百丈野狐精隨身竿木聊
作戲聞見由來忘色聲

噬飫禪悅飽法喜衆若塵沙誰算計靈鷲峰頭極
唱時增上慢人從退避

山中貧 清苦何愁物外身飽腹旋炊菰米飯裹
頭不戴蓮花巾行處支藤堪作杖眠時藉草便爲
茵斯可樂更何嗔儼如兜率逢天親翛然不管人
間事花落花開春復春

山中賤 莫笑寒微無志願拈却青州舊布衫堂
堂擺手輕朝冕靜看明月到天心閒挹清風來水
面任優游無謗怨祖令單提若雷電馬廐牛闌薦

得親正覺場兮普光殿

宗元名大始慈溪胡氏子受業於永明寺
洪武五年詔取高僧邑令馬雄舉之尋授
僧會司僧會

原明二首

祥澤橋

江北江南地欲浮連環五洞鎖中流
洪波有路通車馬碧落無雲動斗牛
潮送夕陽知幾度鶴歸華表又千秋
我來一覽湖山小飛下蒼烟雙白鷗

次韵答定水見心和尚

胸次由來貫九流已將富貴等雲浮
一溪春雨蒲芽綠滿室天香桂子秋
投老何山成獨往題詩小朶憶同游
卽今海內風塵暗且向林泉好處留
白髮蒼顏谷口樵美人不見誰能招
獨客春深但惆悵雙峰日落空岩嶷
貝章早起焚香讀金粟秋蒸掃葉燒
文彩風流有如此雲霄何必羨杭標

原明名元旭四明延壽寺僧飛錫松江
洪武二十三年重建祥澤石梁五洞長二十

四丈廣三丈俗呼塘橋題紀之惜其文
罕傳余僅見石屋珙公塔銘

道立二首

送徐行正人材之京

鴻鴈來時澤國秋西風潮落大江頭
蒹葭楊柳東西岸楓葉蘆花遠近洲
鐘阜烟霞千嶂出蓬萊宮闕五雲浮
丈夫勲業青冥上莫爲思鄉却動愁

和夏尚書登松江百尺樓

百尺危樓勢壓山與君登覽倚朱欄
海門樹色連

天遠江口潮聲帶雨寒塞鴈幾行投晚渚
沙鷗數點浴晴瀾錦箋題得瓊瑤句
身在青冥興未闌

道立名本中洪武十六年住持虎丘師繼
中行復公復公繼行中仁公當是時適寺
中衰賴三師提倡宏朗法幢鼎峙人稱虎
丘三傑云

懋訥二首

昨過定水獲觀中丞相君和見心禪師二詩
亦續其韵

閒陪繡斧訪林墟丹桂飄香九月初濯足溪流山
 鳥近論文香閣晚鐘疎禪翁愛客炊紅稻童子烹
 魚得素書為報中興好消息江南忠饒有新除
 蓮宮翼翼峻廊深雙澗冷冷古木陰朴渥伴禪來
 石室仙禽獻菓下珠林秋深采桂和雲擣夜半撞
 鐘對月吟况有名賢時會集高誥自契古人心

懋訶連江人姓林洪武二年住鼓山

明僧弘秀集卷三 終

明僧弘秀集卷四

虞山毛晉子晉父編

楚石一百六十九首

懷淨土詩一百十首 并自序

儒者之詩云伐柯伐柯其則不遠說者曰
 執柯以伐柯睨而視之猶以為遠信斯言
 也吾宗念佛唯我自心心欲見佛佛從心
 現阿彌陀佛三十二相八十種好性本具
 足不假外求神通光明極未來際名無量

壽至於華池寶座瓊樓玉宇一一淨境皆自我心發之妙喜有云若見自性之彌陀卽了唯心之淨土如楞嚴會上佛敕阿難一切浮塵諸幻化相當處出生隨處滅盡因緣和合虛妄有生因緣別離虛妄名滅殊不知生滅去來本如來藏常住妙明性真常中求於去求迷悟生死了無所得既無所得但是一心若淨土緣生穢土緣滅則娑婆印壞壞亦幻也若穢土行絕淨土行興則極樂文成成亦幻也然此生滅淨穢不離自心心不見心無相可得雖終日取捨未嘗取捨終日想念未嘗想念在彼不妨幻證在此不妨幻修一發心時已成正覺何礙幻除結習幻坐道場幻化有情幻臻極果豈不了世出世間之幻法調御丈夫之事乎昔天衣懷禪師親見明覺盡佛祖不傳之妙常修淨土垂問學者曰若言捨穢取淨厭此欣彼則是取捨之情衆

生妄想若言無淨土又違佛語修淨土者
當云何修乃自答云生則決定生去則實
不去無過此語也余謝事閒居作懷淨土
詩若干首勸同袍之士及同社之人凡有
心者悉令念佛前所謂唯心淨土自性彌
陀不出戶庭夫何遠之有

有箇彌陀在自心纔生一念隔千岑於中豈待回
光照直下翻爲向外尋綠水青山皆妙體黃鶯紫
燕總玄音凡夫只爲貪嗔重不覺身棲寶樹林

我佛真身不可量大人陪從有輝光食時並是天
肴饌行處無非聖道場庭下碧流微吐韻殿前瑤
草細吹香十方一等莊嚴刹終說西方出異方
萬劫修行相好身身光知是幾由旬消磨歲月無
窮壽含裏虛空不老春四色藕花香氣遠諸天童
子性情真况兼善友皆招我來作逍遙快樂人
要觀無量壽慈容只在如今心想中坐斷死生來
去路包含地水火風空頂分肉髻光千道座壓蓮
華錦一叢處處登臨寶樓閣真珠璀璨玉玲瓏

每爲娑婆苦所縈誰聞淨土不求生天人皆是大
乘器草木亦稱三寶名處處園林如繡出重重樓
閣似生成諸賢莫怪歸來晚見說芙蕖始發榮
却望金繩寶界遙樓臺一一倚雲霄黃鶯韻美春
常在玉樹枝柔歲不凋流水有聲隨岍轉好花無
數逐風飄野人自選歸來日何待諸賢折簡招
此邦蕭洒樂無厭遙羨諸人智養恬座用眞珠爲
映飾臺將妙寶作莊嚴純金細礫鋪渠底軟玉新
梢出樹尖眉相古今描不盡晚來天際月纖纖
參差寶構滿層虛縱有丹青画不如林影交飛金
孔雀水光倒浸玉芙蕖分明池上佛身現宛轉眉
間毫相舒百億三千大千界盡令方寸攝無餘
放下身心佛現前尋常盈耳法音宣風柯但奏無
生曲日觀長開不夜天行趨玉階雲冉冉坐依珠
樹月娟娟凡夫到此皆成聖不歷僧祇大果圓
妙明覺體卽如來暫借蓮花養聖胎瑞相且分三
十二流光何止百千垓莊嚴寶具相隨到細軟天
花不假裁上品上生生死絕塵塵剎剎紫金臺

作佛何須向外尋毫旋白玉面黃金人人有寶名
如意種種無求不稱心第一義天離染污出三乘
海斷漂沉自從徹證圓通後耳畔常聞妙法音
未歸極樂尚閻浮漂泊風塵更幾秋殘夢頻驚蕉
葉雨故鄉只在藕花洲屈伸臂項無多地高占人
羣最上頭二大士心憐老病何妨攜手入瓊樓

法王治化寶蓮宮菩薩聲聞滿國中普覆猶如天
在上大明勝似日生東青螺髻接浮雲嶺白玉毫
輝跨海虹世出世間無比者當知體性本來空

見得如來清淨身山河大地絕纖塵螺螭蚌蛤神
通妙蚯蚓蝦蟆法句真不用別求安養國何須重
結往生因一言勘破維摩老堪作毗盧頂上人
紙画木雕泥塑成現前真佛甚分明皈依不是他
家事福德還從自己生萬樹花開因地暖千江月
現爲波清朝參暮禮常如此在處皆爲極樂城
念佛功深罪自除身歸極樂國中居叢林草木瑠
瑤接大地山河錦繡舒香界來從移步後寶蓮結
自放花初玉毫炳煥黃金面天上人間總不如

天人莫不證神通一一黃金色相同散衆妙花爲
佛事盡塵沙界起香風身光觸體成柔軟樂具流
音說苦空却倚雕欄看寶樹無邊佛國現其中
經行地上盡奇珍異草靈苗步步春國界初無三
惡道莊嚴自有衆天人長空落日如懸鼓大聖無
時不現身從曠劫來今始悟故鄉曾不隔纖塵

滿目池臺錦繡橫祥光瑞靄滅還生了無酒色離
煩惱雖有天魔絕鬪爭渴飲醴泉多舞鳳高棲瑤
樹足流鶯待吾託質蓮花後却向琉璃地上行

池上藕花花上人佛光來照紫金身更聞妙法除
心垢盡救迷情出苦輪舉步遍遊塵點國利生終
滿涅槃因娑婆界上光陰短極樂知經幾劫春
淨土真爲不死鄉雲霞影裏望殘陽珠樓玉殿空
爲體翠樹金花密作行款款好風搖菡萏依依流
水帶鴛鴦分明記得無生曲便請知音和一場
一箇浮泡夢幻身如何只是縱貪嗔好尋徑直修
行路休學愚癡放逸人護戒還同冰雪淨操心要
與聖賢親明明指出西飛日有識皆令達本真

幾回夢到法王家來去分明路不差出水珠幢如
日月排空寶蓋似雲霞鴛鴦對浴金池水鸚鵡雙
銜玉樹花睡美不知誰喚醒一鑪香散夕陽斜
風滿瑤臺水滿池花開菡萏一枝枝細聽鳧雁鴛
鴦語正是身心解脫時瓔珞自然成寶玉袈裟全
不假機絲如來相好瞻無盡所得明門誓憶持
遙指家鄉落日邊一條歸路直如弦空中韻奏般
般樂水上花開朵朵蓮雜樹枝莖成百寶羣居服
食勝諸天吾師有願應垂接不枉翹勤五十年
一朵蓮含一聖胎一生功就一花開稱身瓔珞隨
心現盈器酥醅逐念來金殿有光吞日月玉樓無
地著塵埃法王爲我談真諦直得虛空笑滿腮
珠王宮殿玉園林坐臥經行地是金舍利時時宣
妙響頻伽歷歷奏仙音返聞頓悟無生理常住周
圓不動心觸目皆爲清淨土來從曠劫到如今
曾於淨土結因緣二六時中現在前每到黃昏增
喜念遙隨白日下長天如來寶手親摩頂大士金
軀擬拍肩不借胞胎成幻質吾家自有玉池蓮

蓮臺得坐最高層我許凡夫願力能頃刻人心翻
作佛斯須水觀化爲冰玉抽瑪瑙階前樹金匝琉
璃地上繩無限天花滿衣裊十方佛國任飛騰
濁惡衆生也可憐菩提道果幾時圓總云國土隨
心淨爭奈形神被業牽正劒揮來藤落樹迷雲散
盡日流天虛空畢竟無遮障淨土滔滔在目前
一國巍巍一寶王無朝無暮起祥光尼拘律樹真
金果優鉢羅花軟玉房見體自明非日月知春長
在不冰霜又遊佛刹歸來也贏得天葩滿袖香
將參法會禮金仙漸逐香風出寶蓮紅肉髻光流
不盡紫金身相照無邊重重樹網垂平地一一花
臺接遠天諸佛界中希有事了如明鏡現吾前
千樓萬閣寶攢成地是琉璃向下擎骨肉都融身
轉妙塵埃不染思逾清林間玉葉敲風響池底金
沙透水明空界不知誰奏樂鳳簫龍笛有餘聲
無常無我法全該水鳥風林豈異哉不動一塵常
在定遍遊諸刹又歸來凡夫本自同彌勒知識何
嘗離善財堪忍便爲清淨界覺花還向安心開

土淨令人道果圓娑婆性習一時遷魚離密網遊
滄海鴈避虛弓入遠天來往輪迴從此息死生煩
惱莫能纏無心卽是真清泰有染如何望寶蓮
山雲靄靄水泠泠共說西方一卷經石虎却來巖
下嘯泥人先往樹間聽風飄陽焰隨波散雨浥空
花逐蒂零極樂此時堪駐足彌陀何處不流形
無限風光賦詠難樂邦初不厭游觀十虛捲入秋
毫末一粟藏來法界寬瑪瑙殿中金釘鉸珊瑚樓
上玉闌干妙音歷歷開人耳何處飛鳴五色鸞
金銀宮闕綵雲端念佛人居眼界寬寶樹交加非
一色靈禽唱和有千般酥醃自注琉璃椀甘露長
凝翡翠盤不似雪山多藥味衆生無福變成酸
不向娑婆界上行要來安養國中生此非念佛工
夫到安得超凡願力成香霧入天浮蓋影暖風吹
樹作琴聲分明識得真如意肯認摩尼作水晶
釋迦設教在娑婆無奈衆生濁惡何雖向涅槃開
祕藏不妨淨土指彌陀白雲半掩青山色紅日初
生碧海波曠大劫來曾未悟東西誰道沒淆訛

麤境現前猶未識法身向上幾曾知可憐轉腦回
頭處錯認拈香擇火時口耳相傳六箇字聖凡不
隔一條絲堂堂日用天真佛火急回光也是遲
兔角拈來縱復橫隨君坐臥及經行不知自己如
何是却問彌陀作麼生爛炒浮漚爲供養都教露
柱飽彭亨鍊船昨夜浮東海要向須彌頂上撐
念念念時無所念廓如雲散日流天此人造罪令
除罪與佛無緣作有緣仙樂送歸清泰國好風吹
上紫金蓮遙聞妙偈琅琅說不是聲塵到耳邊
或詩或偈演成章塞破山人古錦囊淨土不曾離
穢土東方何異在西方芙蓉冷落秋風早蟋蟀哀
吟夜漏長處處無非觀自在頭頭總是古音王
同人大似不相知索我高吟淨土詩實法何曾有
些子空拳只是誑嬰兒虛空疊作紅蓮座火聚開
爲白藕池未免誑君顛倒欲從頭啞噉是愚癡
日夜思歸未得歸天涯客子夢魂飛覺來何處雁
聲過望斷故鄉書信稀幾度開窗看落月一生倚
檻送斜暉黃金沼內如船藕想見花開數十圍

曾聞白鶴是仙禽日日飛來送好音便欲寄書諸
善友定應知我一生心長思樂土終歸去肯執蓮
臺遠訪臨百歲真成彈指頃娑婆只恐世緣深
本性彌陀一句子金烏玉兔解提撕須臾入海還
飛上頃刻昇天又落西除却晝明并夜暗更無聖
悟與凡迷勸君歸去不歸去愁殺春山蜀鳥啼
一寸光陰一寸金勸君念佛早回心直饒鳳閣龍
樓貴難免雞皮鶴髮侵鼎內香煙初未散空中法
駕已遙臨塵塵刹刹雖清淨獨有彌陀願力深
咫尺金容白玉毫單稱名號豈徒勞晨持萬遍烏
輪上夜課千聲兔魄高歲閱炎涼終不倦天真父
子會相遭如何說得娑婆苦苦事紛紛等蜩毛
故鄉別早話歸遲何待君言我自知客路吟嶼無
一好人生惆悵不多時蒼顏歷歷悲明鏡白髮甦
甦愧黑絲再讀南屏安養賦屋梁落月見丰姿
娑婆苦海泛慈舟此岸能超彼岸不直指迷源須
念佛橫波徑度免隨流千生萬劫常安泰五趣三
途盡罷休縱使身沾下下品也勝豪貴王閻浮

人生百歲七旬稀往事回觀盡覺非每哭同流何
處去閒拋淨土不思歸香雲瑪瑙階前結靈鳥珊
瑚樹裏飛從證法身無病惱况餐禪悅永忘飢
人間苦樂事縱橫達者須尋正路行福報天宮猶
有死神棲佛國永無生風前鸚鵡琴三疊水上芙
蓉錦一絢作計欲歸歸未遂他鄉又見物華更
說著無常事事輕飢餐渴飲懶經營一心不退思
安養萬善同修證永明淨洗念珠重換線堅持佛
號不停聲妄緣盡逐空花落閒向風前月下
馬鳴龍樹是吾師念佛參禪駕竝馳五色雲橫日
沒處一枝花折眼開時玉音了了流仙偈金采煌
煌發令姿曠劫相逢真父子欲將何物報恩慈
卽心卽佛斷千差名教名禪共一家果證無邊身
相好光流不可說河沙餘方妙麗終難竝本願精
深豈易誇大抵熏修須及早臨終免被業緣遮
一自飄蓬瞻部南倚樓長歎月纖纖遙知法會諸
天繞正想華臺百寶嚴此界猶如魚少水微生只
似燕巢簷同居善友應懷我已築浮圖欠合尖

少年頃刻老還衰須信無常日夜催九十六家邪
智慧百千萬劫受輪迴不存寶界花池想爭得刀
山劔樹摧但自淨心生願樂此中賢聖許追陪
西行三十二河沙彼國莊嚴是我家但用一真爲
種子全將七寶作蓮花娑婆極厭今生苦懈慢無
令後世差寶月頓從心水見如今光影正交加
勞生能有幾光陰健只須更病又侵常恐浮雲蔽
西日須營淨舍學東林可憐世上愚癡輩不及華
間智慧禽寶樹亦能談妙法何妨坐聽罷叅尋
當年大士說圓通只在如今日用中都攝六根歸
正念盡回三業向真空香林迥出圓生樹樂境高
超自在宮摠與彌陀心不異光明壽量本無窮
學佛先須學苦空心期妄盡障消融直居十二因
緣外橫截三千世界中湛碧無痕開鏡面純青絕
點出蓮叢男兒到此方奇特快樂逍遙物我同
佛自凡夫到果頭親曾歷劫用功修淨那豈是天
然得大道初非物外求先悟色空離欲海後嚴福
智汎慈舟今來古往皆如此度盡衆生願未休

亂世人如蝨在禪炎炎火宅避無門早知佛國相
期處別有仙家不死村身相短長同父子蓮花開
合表晨昏赤真珠樹黃金屋每夜飛來入夢寬
見說西方住處佳凭高極目興無涯世情每逐炎
涼改人事多因治亂垂白骨可憐縈野艸金臺誰
得挂庭槐勸君早結宗雷社坐看雲端寶仗排
琉璃地列紫金幢翡翠樓開白玉窓文字可誇才
不稱肉身未到意先降能言孔雀知多少善語頻
伽定幾雙清夢正貪歸路直夜闌無奈鼓逢逢
刹海森羅一念包於中不斷聖賢交傾身送想浮
雲外極目斜陽掛樹梢激灩金波隨岸轉參差寶
葉任風敲諸天歎我駸駸老早晚雞棲彩鳳巢
讚佛言詞貴直陳攢花簇錦在尖新自然潤澤盈
身器無數光明湧舌輪稱性莊嚴依報土隨機勸
發信心人願求功德池中水盡滌娑婆界上塵
金作層樓玉作臺琉璃田地絕纖埃惟心淨土無
高下自性彌陀不去來紅日初非天外沒白蓮只
在意根栽衆生障重須存想想極情亾眼豁開

盤中一縷篆煙清坐對疎林落月明凡質到頭非
死死聖胎從本不生生了知解脫空無性還入輪
回度有情寄語前修菩薩子臨終莫忘遠相迎
水無留影鴈橫天真友相攜不待緣金地往生諸
佛子玉池開盡四花蓮虛空物象心恒爾法界根
塵事宛然我欲與君談極樂請君那暇少留連
何處全收念佛功水光湛碧藕花紅廣長舌覆三
千界清淨門開二十空雲網相逢珠的皦風柯自
奏玉玲瓏平生不結神仙願自小思歸極樂宮
紫金身相白毫光對現分明不覆藏鋪地寶花行
處匝滿盤甘露渴時嘗本來淨體初無染何用熏
衣自有香好似一輪西墜日明朝依舊出扶桑
衣不傷蠶食不畊水邊林下好經行身心快樂無
諸苦依正莊嚴在一生念念佛光從口發時時天
樂遍空鳴却嫌鞋鞮泥滓千葉蓮花向足擎
莫將胎獄比花池早向池中占一枝却坐大花成
佛子何煩慈母浴嬰兒口餐法喜真餽饈心得明
門妙摠持般若臺前定回日令人長憶鴈門師

多言極樂向西尋究竟不離清淨心空影入池皆
碧玉日光穿樹盡黃金事如夢幻雖非實理到圓
常却甚深八萬四千真相好請君危坐扣靈襟
當知大道絕浮沉勿謂空門有淺深未入泥丸終
作佛頻磨鍊杵會成針騎鯨跨鶴非吾事貫蝨屠
龍漫此心淨土誰爲問津者臨風不免自沉吟
如來願海固難量晝夜稱名不暫忘夢見玉花開
玉樹身登金殿坐金牀盤中豆子隨聲躍舌上蓮
花遍界香待得工夫純熟後排雲法侶共翱翔
豈待無心心自無無心念佛佛同塗但憑玉號珠
輪轉略異山禽野鼠呼聖道形神元不二禪門定
慧必相扶從今淨洗塵勞障一掬清泠手自斟
百億劫中生死罪纔稱名號盡消除迷時妄想同
春夢我佛真身等太虛宮殿水晶千柱匝園林雲
錦萬花舒癡心不是分高下上上金臺始可居
天樂聲清匝地聞寶階花雨正繽紛千千萬萬金
蓮萼兩兩三三白鶴羣凡地直從心作佛義天長
布法爲雲體含知見香無盡非是娑婆蘭麝熏

八表同游只等閑須臾飛去又飛還玉樓冉冉紅
雲裏珠樹亭亭紫霧間不立君王惟有佛平鋪世
界斷無山天人一樣黃金色盡未來時但少顏
須摩提國讚何窮不與他方佛境同百味酸甜長
滿鉢一身輕健任游空初心便獲無生忍具縛能
教宿命通今古往生留傳記盡塵沙界扇真風
五濁煎熬道未成羣賢修習誓非輕光中每出彌
陀影夢裏親書普慧名繡佛雖齋防退失火車已
現急求生臨風莫灑楊朱淚就我西方徑路行

千年暗室一燈輝萬里蒼蠅逐驥飛臘雪暗抽春
草木人心冥感佛樞機始從不動真金地直過無
邊大鐵圍諸子出門車並息野田空闊白牛肥
水若澄清月始臨當知佛影現吾心春風不易回
枯木磁石應難受曲針未得往生緣障重必期成
就用功深譬如九轉丹砂力一點能令鐵化金
幽居悄悄柏森森不遣紅塵染素襟一佛號收無
量佛後心功在最初心雲開白月毫光滿雨過青
山髻色深當念休生差別解風聲鶴唳盡玄音

明僧弘秀集
曾聞金鼎煉硃砂一服飛驚玉帝家輕舉似風飄
柳絮美顏如日映桃花况修淨業身心妙兼得慈
尊願力加此是長生無比法仙經十卷不須誇
蛄蟻本是轉丸蟲自恨沉埋糞土叢下化鳴蟬離
舊殼高居飲露吸清風塵寰穢境須回首寶關香
臺可奏功未脫如今皮袋子真身已徧太虛空
一帶雲山一艸堂一瓶淨水一爐香心融有念歸
無念日課朝陽到夕陽紅杏兩餘春正好白蓮風
細夏偏長假饒劫火燒千界不動吾家聖道場
朝朝暮暮道心中歲歲年年佛事同一往進修安
樂界六時朝禮法王宮方袍不厭香煙黑坐具何
妨手污紅如此出家今有幾灼然認得主人公
池中蓮萼大如車據實猶爲小小華聖衆略言千
萬億佛身知是幾恒沙我聞妙德同慈氏誰道彌
陀異釋迦南北東西清淨土盡歸方寸玉無瑕
紅蓮常映白蓮開只有金蓮不易栽念念若能離
溷濁生生從此脫胞胎且依彼國嚴新果却遍他
方發舊芽事與種花無少異根苗元向淤泥來

蓮宮只在舍西頭易往無人著意修三聖共成悲
願海一身孤倚夕陽樓秋階易落梧桐葉夜磴難
藏舴艋舟幸有玉池鳧鴈在相呼相喚去來休
羈縻不久化爲塵中有如來相好身濁惡本爲清
淨國死生元是涅槃因千般境界由心造萬種名
言逐意陳世出世間無上士曲開方便度迷人
千經萬論不虛標共指西方路一條念念刮磨心
垢淨時時防護道芽焦栖蓮自覺身安穩得果須
令地動搖謾費工夫推甲子娑婆大劫只崇朝
家在西頭白玉京老來難遣故鄉情每瞻雲際初
三月先注華間第一名密密疎疎琪樹影來來往
往水禽聲紅樓紫殿春長好縱有丹青畫不成
近有人從淨土來池心一朵玉蓮開正當萼上標
名字已向身前結聖胎極樂逍遙長不死閻浮逼
迫最堪哀法王特地垂慈愍同坐黃金百尺臺
吾身念佛又修禪自喜方袍頂相圓曾向多生修
福果始依九品結香緣名書某甲深華裏夢在長
庚落月邊濁惡凡夫清淨佛雙珠黑白共絲穿

念極心開見佛時自然身到碧蓮池火輪罪淨千
千劫琪樹光分萬萬枝善友深談終不厭靈禽妙
語實難思功成果滿須臾事尚謂奔流閃電遲
無邊大士與聲聞海衆何妨逐品分一會聖賢長
在定十方來去摠乘雲談玄樹上摩尼水念佛林
間共命群坐卧經行無罣礙天花隨處落繽紛
悟來荆棘變琉璃露葉風枝亦解吟懸帝釋瓶非
苦果讚聲聞法是靈禽死生歷歷同雙樹凡聖明
明共一心畢竟故鄉歸去好自家樓閣快登臨
日出東方夜落西當頭一句顯全提娑婆便是真
清泰菡萏何曾染淤泥五蓋十纏元自斷衆生諸
佛本來齊不勞動步還家去林木吟風水鳥啼
佛袈裟下失人身重得人身有幾人萬行不如修
白業一心何苦戀紅塵法王立誓丘山重迷子思
歸涕淚頻若解返觀觀自性拋來擲去總家珍
幻身便是法王身其奈衆生喪本真夜卧不妨朝
又起形同尤愛影相親吉祥地現千華座胷臆光
騰卅字輪南北東西皆淨域教流剎剎與塵塵

若非念佛便參禪參得禪時佛現前萬丈碧潭從
底淨一輪秋月向空懸直教表裏光明透盡見高
低物象全只個法身無去住方知不落斷常邊
提起數珠一百八莫教蹉過活彌陀口無剩語心
無念珠不經穿玉不磨疊疊遠山排海岸聲聲幽
鳥囀庭柯勸君莫把爲奇特飯了睡眠奈我何
西望紅霞白日輪仰觀寶座紫金身一方土淨方
方淨十念心真念念真生極樂城終不退盡虛空
界了無塵向來苦海浮還沒何幸今爲彼岸人
娑婆生者極愚癡衆苦縈纏不解思在世更無清
淨業臨終那有出離時百千經裏尋常勸萬億人
中一二知珍重大仙金色臂早來攜我入華池

懷淨土百韻詩一首

欲生安養國承事鼓音王合掌須西向低頭禮彼
方觀門誠易入儀軌信難量佛願尤深廣人心要
久長嬰兒思乳母遠客望家鄉鄭重迎新月殷勤
送夕陽分明蒙接引造次莫遺忘飲啄齋稱首熏
修策最良五辛全斬斷十惡永隄防勿用求名利

毋勞論否臧布裘遮幻質藜糝塞空腸擺撥多生
債枝梧九漏囊精神纔嬾慢喜怒便搶攘水滴俄
盈器江流始濫觴積來功行滿趨取色身強室置
千華座爐焚百種香新衣經獻著美饌待呈嘗莫
點殘油炬宜煎浴像湯形骸同土木戒檢若冰霜
想念離諸妄跣趺在一床剎那登淨域方寸發幽
光骨肉都融化乾坤極杳茫太虛函表裏佛剎據
中央蓮吐葳蕤萼波翻激灑塘鮮飈須動蕩綵仗
恣搖颺燦爛黃金殿參差白玉堂樓隨四寶合臺
備七珍粧鏡面鋪階砌荷心結洞房珊瑚裁作檻
碼礪製爲梁田地琉璃展園林錦繡張內皆陳綺
席外盡繞銀牆覆有玲瓏網平無突兀岡嶠林連
處處琪樹列行行果大甜如蜜音清妙似簧喬柯
元自對茂葉正相當一一吟鸚鵡雙雙集鳳凰瑤
池無晝夜珠水自宮商渠瑩金沙底風輕寶岸旁
高低敷菡萏深淺戲鴛鴦異彩吞群鳥奇葩掩衆
芳千枝分赤白萬朶間青黃暫挹身根爽微通鼻
觀涼頻伽前鼓舞共命後飛翔竟日鶯調舌冲霄

鶴引吭悟空寧有我知苦悉無常大士談玄理聲
聞會寶坊經宣十二部偈演百千章直指菩提徑
俱浮般若航挽回尋劍客喚醒失頭狂九品標龕
妙三乘互抑揚鍊深終絕鑛簸淨豈存糠示現真
彌勒咨參妙吉祥聖賢雲鬣鬣天樂日鏗鏘俊偉
純童子伊優絕女郎語言工問答進退巧趨蹌火
齊恒流焰摩尼益耀苾不須懸日月何處限封疆
食是天餽餼殮非世稻梁掛肩如意服擎鉢自然
漿脫體殊清淨含暉更焜煌袈裟籠瑞靄瓔珞襯
仙裳徧徃微塵國周遊正覺場慈顏容禮覲供具
任持將側聽能仁教還令所得亾及歸彈指頃翻
笑取塗忙每受經行樂誰云坐卧妨普天除鬪諍
匝地息災殃南北威靈被東西德化彰幾番經劫
燒四海變耕桑此界無虧損斯人但壽昌戶丁休
點注年甲罷推詳滿耳唯聞法充飢不假糧永懷
恩入髓且免毒侵瘡試說娑婆苦爭禁涕泪滂內
宗誰復解邪見轉堪傷恐被貪嗔縛甘投利欲坑
君臣森虎豹父子劇豺狼儘愛錢堆屋仍思米溢

倉山中搜雉兔野外牧牛羊奪命他生報銜冤累
世償太平逢盜賊離亂遇刀鎗好飲耽盃酒迷情
戀市娼心狠拋胷索意馬放垂韉逸志摧中路英
寬赴北邙干戈消禮樂揖讓去陶唐戰伐愁邊鄙
烽煙徹上蒼連村遭殺戮暴骨滿城隍鬼哭天陰
兩人悲國天殤歲凶多餓死棺貴少埋藏瓦礫堆
禪剝荆榛出教庠征徭兼賦稅禾黍減豐穰念佛
緣猶阻尋經事亦荒素襟龍奮迅高步鵠騰驤載
顧同群鴈毋爲獨跳獐聖胎吾已就法侶爾相望
寶地同瀟洒金臺共頡頏翹勤山岌業積德海汪
洋曠劫功彌著織毫過卽禳三心期遠到十念整
遙袞必欲超魔界從今奉覺皇

和寒山拾得詩

我讀寒山詩虛空尋鳥跡誰能橫點頭獨有松下
石一字不可加千金豈能易捧心學西子取笑非
求益

身將枯木同心比蓮花淨萬善無異途千邪皆稟
正不離文字相不卽真如性浩浩天地間咸遵法

王令

女伴踏春陽名園百艸香雙飛憐翡翠並立妬鴛鴦
鶯柳細風吹面花深露滴裳暮歸如有失閒夢亦
驚惶

苦樂隨時改形骸與化遷未能拋富貴何處覓神
仙地發金鐘響池開玉鏡圓世人空悵望惟見嶺
雲連

曾到幽居否心知在不言千峰雲影接萬壑樹聲
連鉢有松花粉岩多瀑布泉無人同道味幸自樂
吾年

有人尋佛教疑坐誦禪經不肯求諸已徒勞識一
丁茫然紙上語默若霧中星指出西來意春山疊
疊青

不說無事禪不飲無明酒青山在我左流水在我
右芳艸生滿庭白雲飛入牖從來只麼閒倏忽成
皓首

陶生自荷鉏晚與五兒居迹向東林近心將上國
疎有田多種秫無事好觀書本絕功名念臨淵不

明倫彙編
三才圖會
卷四
三

羨魚

富貴雖云樂貧家亦有觀開門當大野客至倒深
罇就把青荷葉鋪爲碧玉盤浮生如過鳥急景似
跳丸

遊戲虛堂藏莊嚴智慧林一毫無欲念萬事不欺
心

自我得身閒彌年不下山雲深同鶴住果熟共猿
攀最愛千峰碧從教兩鬢斑絕無名與利誰肯扣
松關

問我何所樂山林可棲托礪泉處處流松籟時時
作夜月點明燈朝雲吐飛閣六窗正虛寂萬象同
盤礴仙子海上來俱騎一隻鶴

深林人膽慄絕澗冷淒淒桂樹山中滿桃花洞裡
迷靜聞鐘遠近閑望月高低不覺成華髮何煩降
紫泥

覓心不得心我道無可道枕石山中眠披雲月下
笑昨來顏如玉今旦身已老寄語富家翁田園爲
誰保

住世都忘世春深始覓年山花紅似火野艸碧如烟
月落澄潭裡雲生疊嶂前時時敲石磬驚動老
龍眠

白石照清淪幽棲遠俗塵山高雲作頂地僻虎爲
隣縱有長生理終無不死人蟠桃花果熟知是幾
番春

寒食向西城其誰不慘情白楊千萬葉青艸兩三
莖再聽流泉語如聞慟哭聲焉知有死日爭利復
爭名

翩翩馬上郎借問誰家子賤妾有高樓須君駐行
李雞鳴北斗斜雅噪東方起君意終別離妾身在
泥滓

今日是何年東風碧艸鮮山晴還起霧水暖復生
烟鳥語如相問花枝豈自憐野人無箇事高枕石
頭眠

人生一世間俯仰惟覆載去者日已多曾無故人
在思之氣鬱律感彼雲鬢鬢高岸竟爲谷新松俄
偃蓋百年能幾時虛空終不改

可愛白雲居長年與世疎花殘無戲蝶水靜足游
魚野樹行堪倚園葵嬾不鋤茅簷風雨過飄溼案
頭書

富貴何日來留將少年待少年忽復去惟有白髮
在髮白歸九泉須臾陵谷改方當未足心欲吸無
窮海

晨昏但見雲霞起杖履惟隨鹿豕遊野色山光同
闐寂車輪馬足省喧啾從他鏡裏添霜艸暢我林
間坐石頭無限英雄生又死奈何日月去如流

吾年六十餘自少離鄉里謝事片時閑推心何處
起焚書讀經律染翰修僧史且莫徇浮名人生行
樂耳

由來隱淪客自號清虛士坐石看雲山食松飲溪
水春煖且閑行月明多不睡身從物外樂事絕毫
端累

吾家在何許乃在白雲邊上有數松株下有一曲
泉最好明月夜方當素秋天鳴蟲與落葉共說無
生禪

日僧引集
元
飢食嶺上松困藉岩前艸運卽行數步靜時無一
惱自從削髮來便愛居山好大抵出家人灰寒而
木槁

我今欲說禪不可作禪會謂渠卽是觸謂渠非卽
背背觸二俱掃洞庭湖無蓋如何繼先德將此傳
後代白月上林端清風起天外

吾廬洵可樂水石清且竒森森沿流去騰騰信脚
歸千尋蔭嘉木五采拾靈芝天闊雲霧散月明星
宿稀無人同夜坐自詠寒山詩

借問山中人居山何所好春花滿路開秋葉隨風
掃獨唱誰與和長年不知老無榮亦無辱此樂真
可保

山上松山下石青者青白者白心無生慮自釋何
所爲一閑客

言之深達者心貴似土賤似金無孔笛沒絃琴是
何調太古音

深林中聽松風兩耳寂萬竅通盡情解絕羅籠問
是誰寒山翁

昨向山中住不知今幾年
岩高常隱日樹密但藏
烟策杖遊峰頂飛禽過我前
澄潭深萬丈徹底是
青天

東隣嬌小女芳意未闌珊
眉似初三月琴能再四
彈頻來花下坐自向鏡中看
不料傷春死瑠樓夜
夜寒

誰家遊冶郎白馬繫垂楊
却引如花妓同登載酒
航春風弄水碧落日暎山黃
忽掩泉臺路珍羞不
得嘗

我詩非俗語俗子徒嘲誚
既不說名利又不干權
要得句有誰知臨風恒自笑
可喜復可愕無玄亦
無妙

一鉢檀家飯孤雲野鶴僧
只談心地法堪繼嶺南
能

青山與白雲可作高人侶
風月兩無心時時到窓
戶幾多塵外客未識幽深處
自古優曇花無緣不
能遇

大我須忘我居塵莫染塵
有心皆作佛無路不通

明倫彙編
清貧
津語默空爲座行藏道是親吾非憎濁富性本愛

人間那個無生死萬萬千千爲識情提起金剛王
寶劍却來諸聖頂頭行

世間何事最堪嗟盡是三塗造業查不學白雲岩
下客一條寒衲是生涯秋到任他林落葉春來從
你樹開花三界橫眠無一事清風明月是吾家

層巒疊嶂勢難齊到頂方知世界低蔚密深林藏
鳥獸蕭條古洞起雲霓縱橫逕路從何入來往遊
人向此迷仙境重重遮不見漁舟錯怪武陵溪
滿鉢持來飽有餘人間天上任君居從心印出凡
和聖一悟真空脫舊模

在昔有幽人自言吾喪我我今亦喪吾隱几軒中
坐雲散碧天高風來黃葉墮泠然水一杯旋摘杖
頭果

此身閒逐片雲孤明月清風何處無盡大地人教
作佛一莖艸上一金軀

山好千千萬萬重馬蹄車轍永無蹤道人淨坐深

林夜明月高懸大古風

一作心

捨家得出家有學成無學四壁冷瀟瀟六門空索
索已除桑下戀聊向橋中托天地卽幻化山林同
旅泊笙歌與鍾鼓非吾所謂樂

惡者從他惡善者從他善善惡都莫分從他自舒
卷舒來天地濶卷去滄溟淺伎倆有盡時無窮不
能見

千峰嵐氣收萬壑松聲起明月爲故交白雲作隣
里清風屢拂枝流水長舉似試問不來人欲將何
物比

送哲禪人杖錫訪師兼簡仲默和尚

杖錫老師七十八眼如點漆眉如雪分明畫出須
菩提坐聽孤猿吟落月深山古寺天正寒葉深一
尺堆牀前地爐燒火簾不捲袈裟黑似鑪中烟客
來只恐放烟出爭柰山林藏未密喧喧道價滿江
湖負笈挑囊固非一千里東歸頻寄聲乃翁終似
有鄉情目連鶯子神通妙何必區區圓相成

送寧侍者叅方禮祖

明倫彙編
佛祖叢中無位次參方行脚誰家事隨興一念便
乖張莫向禪門探意旨須知真正道人家到處忘
懷愍自他爛炒浮漚盛滿鉢閒來石上種蓮花

琴

由來學道似調琴清濁高低自在心聲太促時絃
又斷指纔停處韻還沉一塵不到山當戶萬籟俱
消月滿林拋却絲桐勤念佛子期未必是知音

亾金故內

極目離離禾黍苗愁聞野老說金朝百花總爲蜂
添蜜千古真成鹿覆蕉廢主無才謀伐宋元戎有
志在降遼片雲忽作西山雨疑是英雄恨未消

題徑山

五峰之勢欲東垂當寺一峰如覆杯高極上通聞
笑語斷崖終日見樓臺下方鳳舞千山去絕頂龍
分兩道來却憶坡仙三百載壁間詩句逸風雷

送徑山一藏主

一大藏教閒葛藤盡大地人跳不出夢庵本是竒
衲子夜半扶桑吐紅日拈起凌霄峰頂茶却是洞

庭湖上橋松風澗水自談玄却笑區區論權實權
非權實非實白雲道個鉢羅娘帶累兒孫空受屈

賀徑山永首座

摩訶衍法若爲宣五髻崢嶸高插天一唱虛空成
粉碎重提佛祖舊因緣分明劍向眉邊挂豈得瓢
從地上旋彈壓滿堂龍象衆方知法社有英賢

詩送中竺吳權中藏主歸定水兼柬雙桂堂

上和尙

昨日今日霜風寒却回樟亭尋客船江水中分左
右浙鄖峰默破東南天一莖白髮未侵髻萬里驂
騮當著鞭胡不歸來師望汝貫花添刻澹游編

楚石名梵琦四明象山人姓朱氏父杲有
隱德母張氏事佛惟謹夢日墮懷而生公

在襁褓中有神僧摩其頂曰此佛日也他
日必當振佛法照曜濁世因呼小字曰曇
曜後帝師賜佛日普照慧辨禪師之號頗
符神僧之言嗣法徑山元叟端禪師初膠
于名相元叟叱其鉅石塞胷後應書寫大

藏之選至燕都聞城樓鼓聲汗如雨下拊
几笑曰徑山鼻孔今日入吾手矣作偈云
崇天門外鼓騰騰驀劄虚空就地崩拾得
紅爐一點雪却是黃河六月冰東歸再叅
元叟叟笑曰且喜大事了畢未幾出世海
鹽之福臻又遷杭之報國洪武元年應
召說法于蔣山上大悅明年七月二十
六日偈曰真性圓明本無生滅木馬夜鳴
西方日出端坐而逝雲栖大師曰本朝第
一流宗師無尚于楚石築石室扁曰西齋
有西齋淨土詩一卷彼自號禪人而淺視
淨土者可以深長思矣其說法機用則見
于六會語其遊戲翰墨則見于和天台三
聖及永明壽陶潛林逋諸作別有淨土詩
慈氏上生偈北遊鳳山西齋三集若干卷
並傳于世

清遠四首

韓裕之郎中自雲來鳳山致命而還賦詩以贈

鳳凰五色羽天外揚清音朝飲瑤池水莫止碧山
岑聖人御寰宇重譯來獻琛周公讓白雉四海皆
歸心聖教屬季運匡持資老成一絲引九鼎所任
詠非輕無材忝高命薄德愧虛聲寧迂使者轍迢
遞訪山楹

幽蘭嘆

幽花如幽人不生官道傍誤被春風吹巖谷傳芬
芳君子謬見采移植在中堂歲鞋登几席華管送
清觴馨香誰不愛摧折來相將棄置不復顧蕭艾
得其常出處有至理何用心獨傷

次韵奉答蛻菴先生見寄之什

玉湖湛湛秋如練金蓋亭亭翠作曾石蓋雲生龍
聽法花岩月黑虎依僧功名只比蕉中鹿塵業何
如日下燈有待承恩歸共隱手揮如意說三乘

寫扇贈明上人

太湖六月暑氣微龍宮佛屋相因依蜃嘘翠霧作
樓閣鮫織冰綃鳴杼機鍾磬無時空外發笙簫幾
處月中歸投閒擬向上方住共看滄波白鳥飛

清遠名懷涓晚自號竹菴俗姓魏氏南昌人其生時有靈芝產于庭槐占者謂是子將以文顯果英發誦書攻文不待師授蓋全悟禪師俗姓之甥而法門之嗣子時全悟住持集慶大龍翔寺喜而稱之曰此吾宗千里駒也見其學大進又有入吾室之嘆旣呼而告之曰吾據師位者四十餘年接人非不夥能弘大慧之道使不墜者唯爾與宗泐耳洪武初奉 詔大會于鍾山

遂退居錢塘之梁渚八年二月十六日召弟子囑以後事怡然而逝踰七旬火化得不壞者三日牙齒曰鉢塞莫曰寶利羅其詩文曰外集盛行于時艸隸亦爲世珍誦金剛般若經終身無虛日善琴或謂無益笑曰非爾所知是亦般若所寓也淨慈行化日有陳氏婦預夢神僧臨其門及至稽首作禮願爲弟子遂舉大法開導之其婦遂悟去未百步而婦竟與家人別坐脫而

去

西白三首

乙巳清明泊舟柳胥浦

柳胥浦上綠楊邊
客裡清明繫客船
莫遣桃花作紅雨
且看榆火散青烟
笙歌謾說承平日
耕稼深期大有年
邂逅農人卽相慰
軍儲無限望吳天

題梅竹雙清

孤山不見林君復
借宅空懷王子猷
猷愛爾雙清須賦詠
令人千古想風流
縞衣春夢三更月
翠葆涼聲幾度秋
莫把琅玕製成笛
虚心應爲落花愁

錦莊漁隱爲醫士作

錦莊園林錦不如
幽深彷彿神仙居
舍南舍北賸栽杏
水落水生惟釣魚
嚴陵終辭光武祿
郭玉素受涪翁書
眼前生意日已廣
桃源雞犬同村墟

西白名力金姑蘇志誤作萬金吳郡姚氏

子七歲請于母曰兒患世相起滅不常將

求出世間法母俾依吳縣寶積院道原至

正丁酉出世住蘇之瑞光寺自幼喪父筑

孤雲菴于城東以養母或議之公呵之曰
爾不見編蒲陳尊宿乎帝師大寶法王嘉
之授以圓通普濟禪師之號洪武改元詔
公住持大天界寺皆稱爲白菴金禪師尋
以母老舉山泐公自代復還菴居一日忽
示弟子曰吾有夙因未了必當酬之汝等
勿以世相遇我未幾示微疾謝去有淡泊
齋稿行世又有楞伽金剛心經注蓋奉
詔與泐公共事者也其登吳山詩云荒陵
鳥雀聲如怨故國風雲氣未平吳中人多
傳誦

天淵十一首

上命欽和山居詩

每愧匡宗道力微却辭城寺入層嵬清風曲澗頻
移杖落日空山半掩扉祗假香燈爲佛事不將棒
喝逞全威金圈栗棘閑拋擲未許來叅了此機
樓臺一簇已休工寶塔中居老鏡容雲護石城如
踞虎地連鍾阜似蟠龍紫芝燁燁飢堪樂甘露瀼

灑秀所鍾野衲安居何以報願同率土仰仁風
潭潭寶構倚層巔晚歲深居樂靜便畚稻旋春炊
易熟溪芹頻茹味尤鮮道承諸祖顏何厚任重宗
綱力豈全隨分生涯甘淡薄也知率衆必身先
深居樂道自便便負郭寧誇二頃田夕殿明燈多
寶塔春庭香散雨花筵心源湛寂超三世塵慮消
忘卽四禪願把楊枝洒甘露盡令大地作豐年
澄空湛湛月高懸冷照山中靜夜禪獻佛有時來
化樂散花無數擁諸天每懷僧到赤烏日猶憶經
來白馬年稽首法王弘誓力歸心卽使滌塵愆
老來一鉢住岩幽塵境無心得自由空裏每看花
滿眼鏡中漸覺雪盈頭吟餘月照千峰夜定起雲
生萬壑秋身世已知渾是夢百年光景水東流
清江曲曲繞危磯晚歲雲林得所依山鳥頻來如
有意野鷗相對似忘機雪晴當檻松篁盛雨後漫
山筍蕨肥安穩祇憑禪定力清修豈復倦衰微
獨愛山中靜趣多只緣地僻少人過山開曉野如
屏障鳥語春林似嘯歌結社祇應懷永遠賦詩不

必擬陰何坐來萬慮俱忘却道力真堪敵衆魔
白髮山僧住翠蘿餘生身事任蹉跎倦從石上支
頤坐閑向雲中拍手歌設利現時光煜煜伽梨披
處影娑娑鍾山咫尺城東地艸木偏承雨露多
自愧平生江海游何緣直到此峰頭既無寶案投
青玉豈有高幢建碧油龍出洞雲觀變化鳥鳴谷
樹聽啁啾禪餘感戴惟稱頌願祝吾皇億萬秋
鍾山深處住僧房聖遇優隆不敢當道鎮叢林真
有忝恩承殿陛實無忘鼓鍾白晝傳鏗鎔幢蓋青
春照煒煌願率同袍勤報効已甘蔬味勝膏粱

天淵名清濟黃岩李益子母唐氏嘗夢異
僧入卧內遂孕公幼穎敏父母遣皈徑山
古鼎銘禪師洪武四年 召見便殿 上

勞問甚至錫賚還四明萬壽後 召補右
覺義二十年被 旨卽靈谷設普度大齋

陸座說法感佛放光 上嘗親製詩十二
首以寵其行春秋六十有五示微疾索筆
留偈而化闍維收靈骨舍利基于雙徑古

明僧弘秀集
鼎師之塔焉

玄極二首

賜松花謝恩

花熟青松萬樹春
賜沾僧錄兩街臣
茶甌滿泛金英膩
石鉢高擎玉屑新
採自山中香特異
供分天上味尤真
聖恩深廣慚無報
惟有丹心仰紫宸

賜衣謝恩

內使傳宣出紫宸
賜衣何幸及微臣
金襴照耀天人喜
白氎鮮明雨露新
光寵山林回佛日
遍除霜雪布陽春
餘生受用流傳遠
萬歲宗門沐至仁

玄極名居頂號圓
菴台之黃岩人父願道
母葉氏篤信佛乘
協吉夢而生聰慧絕人
年十九從瑞岩恕中愠禪師
十五歲得西丘正傳
始住四明之翠山
次遷婺之雙林
洪武間選預高僧赴見
太祖對揚稱旨
卽授僧錄兼住靈谷
成祖卽位屢加恩
賚永樂某年十二月初二日
無疾端坐而化
春秋五十八
骨莖翠山
恕中和尚塔之

日僧引文集
右嘗讀公欽和御製豐年詩云大田多稼
綠生烟甘露時時散普天又云黃雲遍野
金莖密碧盃浮香玉粒鮮又云率土太平
端有象昊天仁祐本無言又云五雲繚繞
薰佳氣百穀敷榮茂本根又云盛德巍巍
何以報焚香松下誦經文想見皞皞王風
猗歟盛哉

古潭十首

簡招真周菊潭提點

菊潭冷浸一泓秋爲世照空名利愁采藥木鏡長
在手煎茶紗帽淺籠頭丹光出洞紅于火山色入
簾青滿樓鶴背夜聞環珮響御風又作海天遊

于慧日寺退居構南軒成鼎用長老以詩見
賀次韻二首

林下安眠藉聖明數椽頗稱隱居情隔牆十丈紅
塵馬近枕一聲清晝鶯照影石池紗帽淨扶吟野
逕竹筇輕主翁夜若能攜酒好共南軒對月傾
未晚推窗待月明更無塵事可關情鑿池雖小下

雙鷺種柳不多啼一鶯花片隔簾紅雨亂茶烟出
屋白雲輕故人知我或相過裏曲細論肝胆傾

乾元宮

乾元何代宮斷碣不可考臺殿青雲端勢欲壓山
倒春風開碧桃夜雨長理艸孰謂人世間不有蓬
萊島

中峰

中峰高出雲雨上住持頗似生公流聽法頑石亦
點首論到長江無盡頭梵僧馳經來白馬天女散

花下赤虬機鈍若逢蘇內翰解將金帶鎮林丘

頂山栗

峩峩頂山高十月寒霜肅霜栗大如拳紫苞剝黃
玉福荔及夏收宜栗亦早熟獨爾飽風霜香甜頗
無足

慧日寺鐘聲

慧日梁招提層樓市中起霜天吼長鯨清響撼寰
宇州居十萬人一聲齊到耳寒山豈相同獨落客
船裏

簡寶巖渙水壑長老

清風飄飄不口攀水纔出壑寶巖山梅邊立到月
一丈松下卧分雲半間對客酒盈銀鑿落照人詩
好錦爛斑出門有景秋開盡白鳥一雙紅蓼灣

慧日退席後意在歸隱能仁先以一詩寄甘

林諸公

鬢半滄浪頂半枯海虞一個老浮屠秋雲市井人
情薄夜雨江湖客夢孤驥足只思行故道鳳棲豈
待種高梧甘林昔日諸公子還入廬山結社圖

禪房花木

破山古蘭若曲逕通後院上人理花木荷鋤日不
倦花發木向榮庶以慰所願時復花木中行吟少
人見

古潭元末寓居慧日寺國初居能仁寺詩

頗多惜逸去僅存常熟諸詠

竺隱六首

和御製山居詩

鍾山雲氣近蓬萊樓閣重重錦綉堆兜率宮從天

明僧弘秀集
上降樓欄花向月中開道林再世承恩澤園悟當
關震法雷祖道一絲懸九鼎提持全仗出群材
大覺談玄徹九重蔚然扶起少林宗龍光照映神
奎閣象教尊崇玉几峰自昔艸堂留勝踐卽今靈
谷縱高蹤御題詩筆昭雲漢更覺茲山雨露濃
傳得凌霄無盡燈蘭膏烈焰愈輝騰箋經未遜洪
覺範輔教直追嵩仲靈閉戶遍探三藏教入朝分
錄兩街僧皇恩浩蕩深如海聲價奚論十倍增

天竺雜咏

西湖蜃氣作樓臺又是一番風雨來後夜月明秋
似水杪羅花向鏡中開

南澗飛淙雜雨鳴顛風老樹作秋聲庭前攪碎芭
蕉葉添得書窓兩眼明

晴雪生香晝不寒光浮四壁白團團夜深月照斜
橫影只作梅花紙帳看

竺隱名弘道號存翁吳江沈氏世居澄源
里水木佳勝有梵僧相其宅必產高僧果
產師方晬見佛像合掌稱佛號年十三父

命禮密印寺雲屋慈公十九薙髮往參元
叟端公復歸密印忽生五竹于庭因構軒
顏曰五竹日夜究心台宗疏鈔諸書夢與
大明照師同游靈竺賦詩有出紅塵戶外
德業至今存之句師重建光明懺堂于靈
山卽照公廢院始驗前夢昔慈雲懺主製
勸人修期疏手書留寺世爲墨寶兵火失
去迨師住持俄一人不知何來持疏跪告
曰從餘燼中拾此疏聞再舉懺筵奉獻緇
素異之洪武三年被召赴京寓龍河十五
年住上天竺拈香嗣法于我菴無公明年
爲僧錄司左善世二十四年以老乞閒
上許之二十五年九月三十日泊然而逝
世壽七十八僧夏五十九荼毘舍利無數
藏于天竺雙檜峯曰雲隱塔姚少師撰碑
銘嘗奉旨同全室具菴箋注楞伽等經

同庵九首

過牧之水榭

牧之詩序云近于義興縣有水榭

明倫彙編
樓閣當年跨紫冥梵犀花雨肅神靈可憐劫火塵
都暗惟有經臺艸自青一水芙蓉開曉鏡千峰翡
翠立秋屏山川滿眼遺墟在城郭人非半掩扃
余在錢塘時嘗求二先生伯雨仲舉賦水榭詩其手
書真跡失之久矣今水榭亦有城池之變幸孟
鸞祖塔復其舊規田書一詩藏之塔下俾後之
來者知有水榭之名受業故居迺先遺跡也

鍾山法會詩

洪武五年正月十五日朝廷就鍾山寺大

建法會普濟幽冥四年十二月十五日

上御奉天殿集公侯百官宣諭建會之因

禁天下屠宰 上先齋戒一月以嚴法賦

齋戒 一首

玉食金盤去人珍九重齋戒諭群臣版圖賓貢無
中外鬼錄流亡有故新佛事五天均至化民生四
海賀同仁普通有願長蔬食曾夢神僧水陸因

正月十三日三鼓時 上御奉天殿集公

侯百官奉上佛表命禮部尚書齋赴鍾山

啓建法會焚之賦奉表 一首

御手封函出紫宸百靈効職共紛紜尚書夜待三更漏使者朝持五色雲宣室鬼神徒有問茂林封禪謾能文陳情此日趨靈鷲萬歲千秋報聖君

十五日 上服袞冕乘輦輅赴法會至日

夕迎佛 上率公侯百官臨法筵供佛行

大禮樂用善世等曲先是十四日微雪呈祥尋卽開霽是夕星月在天風露湛寂絲竹迭奏燈火交輝禮儀之盛前古莫及賦

迎佛禮佛送佛 三首

鷲嶺幡幢下界來先令滕六淨氛埃微風不動燈如晝明月初昇樂似雷宿衛萬夫嚴虎旅從官千騎駐奄媒袞衣儼在通明殿一朵紅雲擁不開天子臨筵禮覺皇衣冠倍位亦侯王寶臺高處金蓮色珠樹中間玉佩光幣帛奉陳先盥洗茶甌初獻謹焚香漢庭不必論前夢親覩金容在上方皓月華星傍九霄夜深端坐聖躬勞樂聲按舞漁山近花雨飄空鷲嶺高玉冊讀文傳太祝金柈捧

明倫彙編
莫出儀曹從容望燎鑾輿動目送中天白玉毫

宣諭鬼魂 賜以法食賦諭鬼

萬方殺戮到漁樵三日齋宮德澤饒朽骨又蒙周
室葬遊魂不待楚人招千年象教來中國一代威
儀出聖朝慚愧山林何所報耕桑滿野甲兵銷

詔龍灣普放水燈以燭幽暗賦水燈 一首

持節馮夷向夕過遠分燈火出官河斗牛光動天
垂野風露聲沉水息波海族樓臺休罷市鮫人機
杼不停梭九泉無復悲長夜莫問南山白石歌

法會三日 上之臨幸十三日天南娑羅

樹子近臣得之以奏獻焉十四日 詔

皇太子諸王同觀法會賦迎駕 一首

千騎東華玉輦來鍾山渾勝妙高臺旌旗寶樹重
重入樓閣香雲一一開仙伏齋從三日幸春宮詔
許五王陪近臣共說天顏喜收得婆羅樹子迴

同庵名夷簡延陵人洪武五年鍾山法會

詩獨多或病其聲律未嫻然鋪叙最上宗
綱無天寵自從無始以來特見 太祖一

帝因全錄之十一年在杭州淨慈寺修復
殿宇鑄鍊架樓當兵燹之餘蔚成偉觀二
十五年主南京天界寺除僧錄左善世與
止庵祥公同嗣法于平山林和尚先輩稱
師譽徹九重海內方袍之士倚以爲重

靈暉一首

賦劔池

古劔池頭大士家白毫千丈貫彤霞袈裟來聽生
公講時見諸天雨寶花

靈暉虎丘寺僧國初開平忠武王提兵取
張氏因開平駐山中而寺獲免於禍但僧
多散去惟師能住山中且能談古蹟王賓
修虎丘志云放生池洗硯池東晉時有之
今皆湮廢不知所在蓋聞之僧靈暉云爾
志中載瞻無及一聯云洗空塵土惟池水
磨盡英雄是石頭又思斷江一聯云剩水
殘山王霸氣苦風酸雨鬼仙詩惜未見全

篇

月曾公集
帝因全錄之十一年在杭州淨慈寺修復
殿宇鑄鍊架樓當兵燹之餘蔚成偉觀二
十五年主南京天界寺除僧錄左善世與
止庵祥公同嗣法于平山林和尚先輩稱
師譽徹九重海內方袍之士倚以爲重

靈暉一首

賦劔池

古劔池頭大士家白毫千丈貫彤霞袈裟來聽生
公講時見諸天雨寶花

靈暉虎丘寺僧國初開平忠武王提兵取
張氏因開平駐山中而寺獲免於禍但僧
多散去惟師能住山中且能談古蹟王賓
修虎丘志云放生池洗硯池東晉時有之
今皆湮廢不知所在蓋聞之僧靈暉云爾
志中載瞻無及一聯云洗空塵土惟池水
磨盡英雄是石頭又恩斷江一聯云剩水
殘山王霸氣苦風酸雨鬼仙詩惜未見全

篇

無敵二首

悼無疑禪師

一念纔空萬境忘更無餘事可商量翻身未入火
光定驚倒靈山老藥王
出輪迴又入輪迴究竟何曾有去來昨夜冰壺中
火起虛空燒作一堆灰

無敵名智勇天台人初掌竺墳於中竺爲
白雲禪師之嗣洪武三十二年住持上海
法華寺得善達如鏢相繼贊襄之力居多

善達號西源上海金氏子從僧叔能公出
家茲寺久之首憾于上天竺復還松之延
慶爲第二座云如鏢吳郡人西源之孫永
樂四年亦爲法華寺住持無疑名善信蘇
州嘉定人族姓吳年二十九出家禮上海
施水菴僧智德爲師受禪教參請蘇城萬
峰和尚素不識字惟一味禪洪武三十四
年年五十九十月二十八日示微疾乃與
衆言我自出家以來脇不至席工夫今日

明僧弘秀集
了當將從此辭索浴入龕畢

柏子庭三首

題玉山人壁

杖錫穿雲雨濕衣我來君出兩相違
茶邊聽得仙童語學士朝朝向晚歸

題自寫菖蒲二首

盆泓淺淺映幽叢綠髮翛翛墮鏡中
瀟洒憑誰供拂掠淡烟微雨及清風
雲骨溪毛瘦不禁井花濯濯翠陰陰
閒來坐對清

詩眼月落半窗風露深

柏子庭嘉定人嘗講台教於赤城性好浪
迹雲遊乞食村落對人不作長語閒雜諧
謔其嘲遊虎丘云家家恕齋字戶戶雪窻
蘭春來行樂處只說虎丘山蓋謂吳下游
賞動輒必登千人石一時爭尚班恕齋所
作字及僧雪窻所寫蘭故一日偶觸某官
騶從縛至心知其爲柏子庭也命賦所張
蓋應聲云百骨攢來一線收葫蘆金頂蓋

諸侯一朝撐出馬前去真箇有天無日頭
 某官大噱釋之松江大旱延嘉興道士祈
 雨多聚赤練蛇焚之久卒無驗師大書其
 壇柱云誰呼蓬島青頭鴨來殺松江赤練
 蛇其滑稽類如此喜画石菖蒲題句甚多
 惜不盡傳昔淞江薛塔一顛僧不學而能
 詩嘗咏石菖蒲云根下塵泥一點無性便
 泉石愛清孤當時不惹湘江恨葉葉如何
 有淚珠未知師二絕可方駕否

象原一首

關山月

白楊風蕭蕭胡笳樓上發壯士不知還羞對關山
 月去年天山歸皎皎照白骨今年交河戍明明凋
 華髮交河水東流征戰無時歇斗酒皆楚歌歌罷
 淚成血

象原名仁淑徑山興聖萬壽禪寺住持經
 始佛殿未就而終其弟子迓復原報公力
 完之其費則出於姑蘇葛德潤氏

希遠一首

壺中荷花

愛此荷花紅天然匪雕飾披披妍令姿停停映清
湜風引茵陳香露含珊瑚色寘之白玉壺光輝滿
瑤席

希遠名觀通宜與人

古明二首

寄梅雪朱隱居

何處風篁好漁庄路匪遙水光清暑簟花影赤闌

橋坐客分詩卷鄰姬浣酒瓢離懷無可贈春夢過

蘭茗

題天馬圖

八尺飛龍十二閑飄飄來自岢嵐山曾陪八駿崑
崙頂肯逐羣雄草莽間落日倒行悲峻阪西風苦
戰憶重關拂郎可是無新貢天步於今政險艱

古明名靜慧

立成一首

陰霾

非烟非霧暗蒙
雁半接江雲半掩空
全仗在風一
吹散萬方人
玉壺中

住東林能智菴

明僧弘秀集卷四終

明僧弘秀集卷四終

卷之四